

GO LEBELELA

Go Tše DISABONWEGO

 Go bonala go le botse go ba morago ka ntlong ya Morena, bošegong bjo, ka morago ga bošego bjo bo bjalo bja go makatša bjalo ka ge bošego bja go feta bo bile. Gomme re bile le nako ya letago, mašego a mabedi goba a mararo a a mafelo fa ka moagong, gomme re leboga Tate wa rena wa Magodimong bakeng sa yona. Disoulo di tswaletšwe ka Mmušong wa Modimo. Gomme dipego tše botse bjalo go tšwa go ditirelo tša phodišo!

² Gomme re sa tšo hwetša lentšu nakwana ya go feta, gore mosetsana yo a bego a etšwa felotsoko godimo ka godimo fa, ka toropongkgolo tsoko, yoo a bilego le leukemia, ge . . . o begilwe go fola, lehono, ke ngaka ya gagwe, gore le—le lesea le fodile. Uh-huh. Gomme ba . . . O be a swanetše go ba moromiwa. Le elelwa taba. Gomme—gomme Sathane o be a leka go—go mo hlakola se sebjalo. Gomme o begilwe go phelega le go fola, go tšwa ke ngaka ya gagwe.

³ Le modiredi wa sefofu yo a bego a le mo go amogela pono ya gagwe, le ba bangwe! Gomme go no ba dilo tše kgolo Morena a di dirago.

⁴ Bjale, bošegong bja go feta ke tšeetše sehlopha ka kamoreng ya thapelo ka fa, bakeng sa go no bona ge eba bodiredi bjo boswa bjoo bo tshepišitšwego bo tla ba gona ka tabarenekeleng fa, pele re betha tente. Gabotse, bjale, bokgole bjo ke tsebago, go be go se selo go feta feela . . . Feel a ka pela ge ke ile ka fale, Moya wa Morena o tlide ka gare, gomme O nno thoma go hlatha meboya, le go botša batho ka mathata a bona le go ya pele.

⁵ Eupša, ke a makala. Ke botšišitše batho bale, ge eba go be go le tsela e ka ba efe ya go kgonega go bona go šala. Ke tla no rata go ba botšiša ge eba go bile le phetogo ka go bona. Ge ba ikwela gore ba fodišitšwe, goba phetogo e ka ba efe ye e bonalago ka tsela e ka ba efe; ke ba botšišitše, bošegong bjo, ge nka ba bitša, ge ba ka kgona go tsena ka moagong, ke rata gore bona ba sware seatla sa bona godimo. Bjale, ge ba le fa, gomme ba ile ba se ke ba swanel a go ya gae, bohole ba be ba le batho ba go tšwa ka ntle ga toropo. Gomme ge ba ile ba se ke ba swanel a go ya gae, gomme ba tsene ka gare ga moago, gomme o ikwela gore go bile le phetogo ye kgolo, a o ka iša seatla sa gago godimo. Bona, bao, ge e ka ba mang mo yo a bego a le ka moagong bošegong bja go feta, a rapeletšwe morago mo. Bjalo ka ge ke sa bone diatla e ka ba dife, ga ke tsebe go eba batho ebile ba be ba ka šala.

⁶ Fale, yo motee, yo motee morago fa. Go lokile. Yo motee fale. Gabotse, seo se kaone kudu. O ikwela gore go bile le phetogo, a yeo ke nnete, mohlomphegi, wena yo a swerego seatla sa gago? [Ngwanešu o re, “Ee. Ke bile godimo, letšatši lohle.”—Mor.] Gabotse, seo ke se sebotse. [“Ke a kobega. Ga se ke be le tlhoko ya sehlare bakeng sa yona, letšatši lohle, goba, gabotse, bošegong bja go feta.”] Re . . . Seo se kaone kudu, gomme re a leboga. Go be go se selo se bonagalago seo re ka kgonago go se bona, le a bona. Gobane . . .

⁷ Gomme go be go le mo—mo mohumagadi ka kamoreng, yo a bego a tshwenywa ke seemo sa monagano. Gomme Moya wo Mokgethwa wa thoma go bolela le yena, le go mmotša dilo tše di bego di tšewa . . . di diregilego ka bophelong bja gagwe, moo a nagannego gore se sengwe se mo diragaletše, se se sego sa ke. Gomme ke a thanka, ge ngwanešu a le, yena yoo a lego gona, yoo a tsebago seo. Gomme nako yeo O thoma go mmotša ka motho yo a bego a na le maledu a matelele, le moriri wo motelele, o mo rapeletše. O be a dirile . . . tlogile go yena, o rile, “Aowa.” Gomme ka gona go laetsa go nepagala le go phethagala ga Moya wo Mokgethwa, O ile morago gape, le go topa motho, le go ba botša o be a le mang, le moo seo se diregilego. Nako yeo o rile, “Ke a eelwa bjale.” E bile mengwaga ye metelele ya go feta. Ka fao phethagalo ya Moya wo Mokgethwa! Oo, O kgonthe kudu!

⁸ Bjale, re pitlagane, gomme feela kopano ye nnyane ye fa, feela pele ke tloga gape. Gomme ke be ke thabile kudu bošegong bjo, go kopana, feela ge ke etla ka gare, mogwera wa kgale, Ngwanešu Rogers, go tšwa tlase ka Milltown, Indiana. Gomme bagwera ba ke sego ka ba bona lebaka la mengwaga. Ngwanešu Creech gape, o be a le mo mantšiboa a go feta.

⁹ Gomme lehono, ka go dipoledišanonyakišo, Moya wo Mokgethwa o be o makatša, lehono. Gomme go bonala o ka re mohlomongwe e no ya go tšwelapele lebakana, go fihla tente yela e etla ka gare, godimo ka tlase ga bodiredi bja go swana bjoo ke bilego le bjona. Gobane, ka go dipoledišanonyakišo lehono, go bile dipono tše nne tše kgolo tša go ikgetha di diregilego, ka go dipoledišanonyakišo. Kafao, go bonagala, mohlomongwe, ke tla tšwelapele go fihla mohlomongwe tente e thoma, goba e ka ba kae A kgethilego go thoma go bega Leina la Gagwe ka tsela ye mpsha. Eupša ge E dira, e tla no ba go phethagala bjalo ka tše dingwe. E tla no ba . . . Gomme ke tshepetše go Modimo gore e tla ba ye kgolwane go feta tše dingwe. E sego ka lebaka la—la bodiredi bja rena, eupša ka lebaka la balwetši le batho ba go hloka. Go ne tlhoko ye bjalo ka nageng lehono!

¹⁰ Bjale re tla ya thwi go otlologa go Lentšu, le gore bale ba emego ba se eme botelele kudu. Bjale, sa pele, pele re bala Lentšu la Gagwe, a re boleleng le Yena ka sebele, ge re inamiša dihlogo tše rena.

¹¹ Morategi Modimo, re tla ka Bogoneng bja Gago bjo bokgethwa bjale, ka dipelo tše di kokobetšego le dihlogo tše di inamilego. Gomme re kgopela Wena go re lebalela se sengwe le se sengwe seo re ka bego re se dirile, goba—goba ra gopola, goba ra se bolela, go kgabola letšatši le, seo se bile kgahlanong le Thato ya Gago. Re tla kgopela gore ka mogau O tla swarela yo mongwe le yo mongwe wa rena.

¹² Gomme re kgobokane bošegong bjo e sego bakeng sa morero wo mongwe eupša go rapela Wena, le go hlagiša maikutlo a rena le go boboelwa ga pelo ya rena go Wena. Gomme re na le nnete, Morena, gore phuthego ye nnyane ye yeo e pitlaganego ka go maboto a mannyane a bošegong bjo, ga se ya tla mo go bonwa. Ga se ba tla mo bakeng sa morero wo mongwe eupša go hlagiša lerato la bona go Wena. Ba be ba ka se eme ka ntle go dikologa mafastere, le go dikologa maboto, le maoto a bona a baba, go no bonwa. Ba mo ka gore ba a dumela, gore, “Wena o, gomme o moputsi wa bao ba tla Go nyakago ka kgonthe.”

¹³ Re tla kgopela tshwarelo go sebe sohle sa batho. Le Maatla a phodišo go tlišwa godimo ga balwetsi le bahloki. Gomme re Go kgopela go šegofatša Lentšu la Gago, Morena, ge re Le bala. Ga ra lekanelo go hlatholla Lentšu le. Kafao a nke Moya wo Mokgethwa o tle, le go tsena thwi ka go Lentšu, le go Le bjala go teba ka dipelong tša batho. Gomme a nke, ka se, go be le puno ye kgolo ya disoulo le tirelo ye kgolo ya phodišo. E fe, Morena, ka gore ka go kokobela re kgopela se ka Leina la Jesu. Amene.

¹⁴ Bakeng sa palo ya Lengwalo, bošegong bjo, ke rata go bala go tšwa go Puku ya Dikgoši tša Bobedi, go thoma go temana ya 8. Gomme sehlogo sa ka bošegong bjo ke: *Go Lebelela Go Tše Disabonwego*.

¹⁵ Bošegong bja mathomo, ke be ke rera ka thuto ya: *Go Mo Tsoša Go Tšwa Historing*. Gomme bošego bja bobedi, bošego bja go feta, ke be ke rera ka thuto: *Go Be Go Se Bjalo Go Tloga Mathomong*.

¹⁶ Gomme, bošegong bjo, hlogotaba ya ka ke: *Go Lebelela Go Tše Disabonwego*. Bjale, Dikgoši tša Bobedi, tema ya 6, go thoma go temana ya 8.

Ka gona kgoši ya Basiria a lwa kgahlanong le Israele, gomme a tšeа eletšana le bahlanka ba gagwe, a re, Re tla kampa ka lefelong le le bjalo le bjalo.

Gomme monna wa Modimo o rometše go kgoši ya Israele, a re, Hlokomela gore le se feteng lefelong le le bjalo; ka gore Basiria ba tlide tlase.

Gomme kgoši ya Israele e rometše go lefelo le monna wa Modimo a mmoditšego le go mo sebotša ka lona, gomme a iphološa yenamong kua, e sego gatee goba gabedi.

Kagona pelo ya kgoši ya Siria e be e tshwenyegile ka selo se; gomme o biditše bahlanka ba gagwe, gomme o rile go bona, A le ka se mpontšhe ke mang wa rena a lego bakeng sa kgoši ya Israele?

Gomme yo mongwe wa bahlanka ba gagwe o rile, Ga a gona, morena wa ka, O kgoši: eupša Eliya, moprofeta yoo a lego ka go Israele, o botša kgoši ya Israele mantšu a o a bolelago ka kamoreng ya gago ya borobalelo.

Gomme o rile, Sepela gomme o hlole moo a lego, gore nke ke romele gomme ke mo tšee. Gomme o boditše, a re, Bona, o ka Dothane.

Kagona o rometše dipere kua, le dikoloi, le lešaba le legolo: gomme di tlide bošego, gomme ba rakelela toropokgolo.

Gomme ge mohlanka wa monna wa Modimo a tsogile ka leselaphutiana, gomme... -keletše toropokgolo bobedi... di dipere le di dikoloi. Gomme mohlanka wa gagwe o rile go yena, Mmalo, mong wa ka! re tla dira bjang?

Gomme a araba, Se boife: ka gore bao ba nago le rena... ba feta ba ba... nago le bona.

Gomme Eliya o rapetše, gomme o rile, MORENA, ke a go rapela, bula yo... bula mahlo a gagwe, gore a ke a bone. Gomme MORENA o butše mahlo a lesogana; gomme o bone: gomme, bonang, dithaba di be di tletše dipere le dikoloi tša mollo... go dikologa Eliya.

¹⁷ Bjale a nke Morena a oketše ditšhegofatšo tša Gagwe palong ya Lentšu la Gagwe.

¹⁸ Ke selo sa go tlaba gore motho yo a dirilwego ka seswantšho le go swana le Modimo, gomme a biditše ke Yena go sepela ka tumelo, a dumela gore Modimo o gona, a ka kgetha go sepela ka pono sebakeng sa ka tumelo; ka morago ga modirelo wa gagwe, boyena bja gagwe, le tšohle tše di dulago ka go yena di be di beakantswe ka go seswantšho sa Modimo. Gomme Modimo ke Jehofa yo mogolo yola Yo a bitšago dilo tšela tše di bego di se gona, o ka re di be di le gona. Gomme motho, o dirilwe go phela le Modimo ka mokgwa wo, efela o kgethile go sepela ka pono ya gagwe. O nyaka go ba molaodi wa gagwe mong. Ga a nyake yo mongwe go mmotša a dire eng. Yeo e no ba tlhago ya motho. E netefaditše go ba bjalo ka serapeng sa Edene, ge a lobile kopanelo ya gagwe le Modimo, ka go kgetha go ya ka tsela ya gagwe mong, go se be le yo a itšego a bušago godimo ga gagwe.

¹⁹ Eupša motho o dirilwe bjalo ka nku. Gomme nku ga e kgone go hwetša tsela ya yona go ya morago, ke a botšwa. Ge e timetše, e timetše ka go felela. Gomme yeo ke tsela ka motho. Ge a

lahlegile, ga a na thušo ka go felela. O swanetše go ba le modiši go mo hlaha.

²⁰ Gomme motho, ge a kgetha, ge matšatši a tšwelapele, re hwetša motho kgafetšakgafetša a gakala kudu, a kgetha bokaone go sepela ka go bona go feta sebakeng sa tumelo, ka Disabonwego. Gomme ge a dira seo, o hlakola motho wa ka garegare, e lego soulo. Gomme yeo ke karolo ya Gosafelego ya motho.

²¹ Bjale, “Motho a ka se phele ka borotho bo nnoši,” go boletše Morena, “eupša ka Lentšu le lengwe le le lengwe le tšwelego molomong wa Modimo.”

²² Gomme go beng mmele ga motho, go hlokamelwa, ga se lebaka lohle le Modimo a mmeilego lefaseng, ka gobane se a se dirago ka go beng mmele go ba bonnyane kudu. Ke soulo ya gagwe, ye e bolelago. Ke motho wa ka gare, yo a sego a tla go tšwa lefaseng. O tšwa Legodimong, gomme yeo ke karolo ya Gosafelego ya motho.

²³ Eupša, efela, go a tlabo gore o leka go nagantšhiša tsela ya gagwe mong. Gomme re e hwetša bjalo ka Mangwalong, gore, ge motho a kgetha go sepela ka tsela ya gagwe mong le go dira ka tsela ye a nyakago, Modimo o no mo tlogela a nnoši.

²⁴ Motho ga a swanela go inaganelo bakeng sa gagwe, eupša o swanetše go dumelela monagano woo o bego o le ka go Kriste go ba ka go yena. Ga ra swanela go inaganelo bakeng sa renabeng. Re swanetše go bitša e ka ba eng kgahlanong le se A se boletšego o ka re ga se sona. Ga go kgathale se mahlo a rena a teleimago go ba, ga re phele ka se re se bonago. Re phela ka se re se dumelago.

²⁵ Matšatši a se makae a go feta, ke be ke theeditše lenaneo mo seyalemoyeng, ke etla sekolong sa Lamorena, gomme e be e le kahlahlo ya go dikologa tafola, le batšwamahlalagading, ka Louisville. “Ke eng se tee sa selo se bohlokwa kudu? A mosetsana o be a swanetše go hwetša mošemane ka moriri wa dikhele; goba, mošemane, mosetsana ka mahlo a mabotse a bolou goba a matsothwa? A seo se dirile phapano?” Go bonala o ka re seo e be e tla ba selo se segolo go motšwamahlalagading. Eupša seo ga se selo se segologolo.

²⁶ Selo se segologolo ke, hwetša Modimo wa gago, Modiri wa gago. O se ke wa hlakahlakanya go nyala. Nyala mošemane yo a dumelago feela tlwa go swana le ka mo o dirago. Ka gore, morago ga tšohle, Modimo ke selo se bohlokwa kudu se re lego lefaseng go se dira, ke go Mo hlankela. Gomme ge o nyala goba e ka ba eng kgahlanong le Leo, o tla e lefela mo matšatšing ao a letšego pele ga gago. O swanetše ka mehla go elelwa, “ka tumelo,” gomme e sego ka pono. “Moloki o tla phela ka tumelo.” Gomme re lebelela go tše Disabonwego.

²⁷ Gomme re ka no ya pele lebaka la diiri tše mmalwa, go bolela ka letšatši la sebjalebjale, ka fao banna le basadi, lehono, feela go

lebelela ka go felela. Gomme ba ya go theoga mokgotha, gomme ba ya go kgetha kereke ye ba swanetšego go ya go yona, le go godišetša bana ba bona ka go yona. Gomme ba tla puruputša go dikologa go kgabola toropokgolo, e sego go leka go hwetša kereke ya semoya kudukudu, eupša kereke ye kgolokgolo kudu ba ka kgonago go e hwetša, ye tee ye e nago ma—ma—ma mašaba a magologolo, le go apara bokaonekaone, gomme motsebalegi wa toropokgolo o ya go kereke ye bjalo ye, moo go bitšwago “legoro le lekaonana,” bokgole bjo batho ba tsebago. Gomme ka gona, ka kerekeng yeo, ba tla leka go hwetša modiredi yo a lego, yo ba mmitšago, “wa monagano wa go se pitlagane,” yo a tla no nyakago go ba dumelela ba phele ka tsela e ka ba efe ba dumago, gomme ba ba ba kereke yela.

²⁸ Eupša monna wa semoya, ka gare, ge o ka mo fa tokelo ya tsela, a ka no go hlahlela go mišene wo monnyane felotsoko, moo go sego batho ba bantši, eupša go na le Moya wa Modimo yo a phelago. Ka gore, motho wa ka ntle o iphepa ka saekolotši le bohlale, eupša motho wa ka gare o iphepa ka Lentšu la Modimo.

²⁹ Gomme bjale ge re ka bula, ka Dibeibeleng tša rena, go ba bantši ba baanegwa ba Lengwalo, go tla re tšea diiri go ya go e kgabola. Eupša a re nong go nagana ka Puku ya Bahebere, tema ya 11, lebaka la metsotso e se mekiae. Gomme re bala fa, gore Abraham, o be a no ba motho, gomme o phetše ka toropongkgolo ya Uri ka nageng ya Bakaladea. Gomme feela monna wa mehleng wa mosepelo wa letšatši le lengwe le le lengwe, eupša letšatši le lengwe o tlie a kopana le Modimo. Gomme Abraham o ile a fetolwa, go tloga letšatši leo go ya pele. Ga go kgathale o tsenetše kereke ya gagwe gabotse gakaakang, kereke ya tatagwe, eupša, ge a kile a kopana le Modimo, o be a le motho yo a fetogilego.

³⁰ Gomme ke a dumela gore seo ga se sa kgaotša go ba gona le bjale lehono. Monna a ka no ba moleloko wa kereke wa go botega. A ka no ba a sepela thwi pele ga moagišani wa gagwe le lapa la gagwe, eupša, ge a kopana le Modimo, ke monna yo a fetogilego.

³¹ Nako ye nngwe ya go feta, ke elelwa ke bolela le motho wa bohlale, yo a rilego, “O ka tsoge wa tseba bjang go na le e ka ba eng go fapano go feta se bodumedi e ka ba bofe bo ka kgonago go se tšweletša?”

³² Ke rile, “Ke badile, ka Beibeleng, ka Modimo yo a phelago. Ke badile ka go loka ga Gagwe. Ke badile ka kgotlelelo ya Gagwe le Maatla a Gagwe. Gomme ke dumetše seo feela bontši bjalo ka ge e ka ba mang a ka se dumela. Eupša letšatši le lengwe ke kopane le Yena yola ke badilego ka yena, ka gona go bile phetogo ya ka pela. Gomme ga se nke ka ke ka ba wa go swana ge e sa le, gomme ke a holofela nka se tsoge ka ba.” Sengwe se a direga. Ge ponon e šitwa go se tšweletša, tumelo e fao go swara lefelo le go se tšweletša.

³³ Gomme re bona gore, Abraham, o be a se lesogana ge se se direga. O be a le mokgalabje, bogolo bja mengwaga ye masomešupa tlhano. Gomme mosadimogatša wa gagwe, Sarah, yo a bego a le kgaetšedi wa gagwe wa seripa; gomme ba be ba nyalane ye mentši, mengwaga ye mentši, ge e sa le a be a le mosetsana wa e ka ba lesomešupa, go a dumelwa. Gomme Modimo o boditše Abraham, “Ke go kgethile le Sarah, gore le ya go ba le ngwana.” Gomme Sarah o be a le moopa, bophelo bjohle bja gagwe. Eupša Abraham ga se a tsoge a lebelela se mahlo a gagwe a bego a tla se bona, mokgekolo wa mašošo, mengwaga ye mentši ya go feta nako ya bophelo, go ba le bana, eupša o lebeletše go tše Disabonwego, gomme o bone Isaka. Ka tumelo o bone Isaka. Gomme yena, ka morago ga go lebelela go tše Disabonwego, “O biditše dilo tseo di bego di se gona, mo o ka rego di be di le gona.” O ile a ba le go getsola ga tše Disabonwego. Ka tumelo o ile a e bona. Gomme Beibele e a bolela, gore, “O kgotleletše, bjalo ka go bona Modimo wa gosebonagale le yena,” gohle go bapa le tsela.

³⁴ Ge motho gatee a swara pono yela ya Modimo wa gosebonagale, le go tseba gore ka mehla O gona, go na le se sengwe seo se beago mogopolo wa monna yola sekeng. Se bea ditiro tša gagwe sekeng. Gomme mo nakong ya tlalelo le bothata, se tla fela se mo dira a lebelele godimo le ka godimo ga dilo tše di regago go mo dikologa, gobane o lebeletše go Disabonwego, efela, ka tshepišo.

³⁵ Bjale, ka fao Abraham, e sego feela gore o bone tša Gosebonwe... Gomme lebaka le a se dumetšego, e bile ka baka la gore Modimo o se boletše. “Gomme ge re hwile ka go Kriste, re Peu ya Abraham. Gomme ge Moya wo o bego o le ka go Kriste o dula ka go rena, O dira selo sa go swana. Go tšeа tshepišo ye nngwe le ye nngwe ye Kgethwa ya Modimo ye e lego ka Beibeleng ya Gagwe, gomme e E bitša lebaka la bjale, gomme e ikhutšiša Yonamong godimo kua.

³⁶ Moo, ge o lebelela, ka mahlo a gago, gomme o bona bjale gore setšhaba sa rena se a roromela le go tlhakgasela. Maru a dintwa a fofa mogohle; setšhaba se sengwe le se sengwe ka tlase ga nako ya go tlalelwa le ye thata. Leswao le lengwe le le lengwe, leo Jesu a rilego le be le tla direga, le a direga. “Go tla ba le maswao ka magodimong godimo le fase lefaseng.” Gomme dilo tše kgolo di tla be di direga, boka dipiring tša go fofa le dilo tša sephiri di diregago.

³⁷ Eupša O laetše Kereke ya Gagwe go phagamišetša dihlogo tša bona godimo, ka letšatšing leo, le go lebelela godimo, gobane Kriste wa gosebonwe o tla be a tšwelela ka pela gabotse. Kafao ge feela re sepela ka go bona, re tla ba bana ba leswiswi, kgonthe go lekanela bjale. Eupša ke thakgetše kudu go tseba gore go ne Seetša seo se phadimago ka pelong ya modumedi yo mongwe le yo mongwe, go fihla Letšatši lela la Gosafelego ge Jesu a tla tla.

³⁸ Bjale ke thuto go rena, go lebelela go se Abraham a se dirilego. Gomme ka gona ga se a e dumela feela, eupša o e lokišeditše. O dirile ditokišetšo bakeng sa...ngwana yo yoo a mmonego ka tumelo, mengwaga ye masompedi tlhano pele ngwana a ka tsoge a tla. Gobane, o be a lemogile gore Yena Ÿo a mmoditšego, o be a kgona go boloka tshepišo yeo A mmoditšego. Ga se a ke a šetša e ka ba efe tlhago ya gagwe, a le mengwaga ye lekgolo ka bokgale, boyena bja gagwe bja mmele, goba ga se a ke a šetša, le gatee, go hwa ga popelo ya mosadimogatša wa gagwe, Sarah. Gomme mongwadi wa tshwayo Kgethwa o a re botša, gore, “Ga se a thekesela go tshepišo ya Modimo ka gosedumele; eupša o be a tiile, a efa letago go Modimo.” A motho!

³⁹ Gomme, lehono, ga go tlhokego, ga go tlhokego ya ebile go e batamela ka tumelo ya bohlale. O ka se tsoge wa kgona go e dira. O tla tloga kerekeng go ya kerekeng, le go tloga mothalong wa thapelo go ya mothalong wa thapelo, gomme wa se tsoge wa e hwetša. O swanetše go tla lefelong moo e dudišegilego ka Gosafelego, gatee ya ba moka. E ba gore Yena ke Modimo, goba ga se Yena Modimo. Ke kwela batho bohloko; bjalo ka ge ke be ke bolela mantšiboa a go feta.

⁴⁰ Gomme Jesu o rile, “Ke nna Morara, gomme lena le makala.” Gomme Morara o hloga lekala la mathomo. Gomme lekala la mathomo e bile pentecost, gomme tšhegofatšo ya pentecostal e gatišitšwe ka go Puku ya Ditiro. Gomme ge lekala la pele e bile pentecost, lekala la bobedi le tla swanelala ke go ba pentecost gape. Gomme le tla swanelala go enya mohuta wa go swana wa Kereke le boitshwaro lekala la pele le e entšwego.

⁴¹ A Jesu ga se a bolela ka seo ka go Mokgethwa Johane 14, ge A boletše gore lekala le le bego le sa enywa kenywa le be le tla ripša, le be le tla pona? Fao ke mo dikerekemaina tša rena lehono di lego, di tla thenelwa go tloga go Morara.

⁴² Feela tša go enywa kenywa, mohuta wo o enywago kenywa le mediro ya Moya wo Mokgethwa, di tla kgona go tšwelapele ka go Morara. Ka gore, Bophelo bjo bo lego ka go Morara, bo enywa ka go lekala. Gomme Bophelo bjo bo bego bo le ka go Jesu, bo be bo le ka go Kereke ya mathomo. Gomme ga se ba sepela ka pono. Ba sepetše ka tumelo, ba dumela se Modimo a se boletšego e be e le Therešo. Oo, a phapano e lego yona, ge banna ba ba tla sepelago ka tumelo, le go bitša e ka ba eng yeo e lego ka pono, yeo e lego kgahlanong le Lentšu, mo o ka rego e be e se gona. Re hloka mohuta woo wa tumelo ka Kerekeng.

⁴³ Moshe, ge a bile bogolo bja mengwaga ye masomenne, lesogana, gomme, ge go etla go pono, Moshe o bile le lefase ka seatleng sa gagwe. O be a le farao wa go latela wa Egepeta. Gomme o bile le dinaga tšohle ka lefaseng, thwi ka seatleng sa gagwe, go ba kgoši godimo ga lefase ka moka, a tseba ka letšatši lela. Gomme, go le bjalo, o lebeletše go kgabola

lefastere leo Farao a lebeletšego ka ntle ka lona, gomme a bona Bahebere bale.

⁴⁴ Go Farao, yo a ba lebeletšego, ba be ba se selo eupša sehlopha sa badubaleraga, tlase fale ka lerageng, ba dira setena. Go motsebalegi, ge a be a feta kgauswi, ba be ba swana. Batho ba go apara gabotse, "E be e le sehlopha sa makgoba; e sego selo eupša dipshikologalerageng."

⁴⁵ Eupša ge Moshe a lebeletše ntle ka lefastere la go swana, o ba bone go fapano, gobane o lebeletše go tše Disabonwego le go tseba gore Modimo o tshepišitše gore O tla ba namolela go tšwa lefelong leo, le go ba iša go naga ya tshepišo. Ka gore, o be a lebeletše go tše Disabonwego. O bone mengwaga ye e bego e etla, pele. O bone Egepete e senywa, efela o be a le ka go nako ya gagwe ya go khukhuša. O bone Egepete bjalo ka ge a le lehono. Gomme o bone Israele yohle e dutše ka go iketla tikologong ya Abraham, ka Letagong. Gomme ka tumelo o kgethile go tšebo—bo bobebobe bodumedi bo bego bo ka kgona go mo fa, le go bo bapetša le bokaonekaone bjo lefase le bego le ka kgonago go mo fa. "Gomme o kgethile go tlaišega ka kgobogo ya Kriste, gomme a e sema lehumo le legologolo go feta Egepete yohle e bego e ka kgona go mo fa. Gobane o kgotleletše, bjalo ka ge eke o bona Yena Yo a sa bonagalego. Modimo o boletše le Moshe, gomme Moshe o tsebile Modimo o be a le Mang. Kafao, ga se a lebelela godimo ga go kganya.

⁴⁶ Gomme mo nka no bolela go kereke bošegong bjo. Moshe o bile, ka seatleng se tee, bokaonekaone bjo lefase le bego le ka kgona go mo fa. Go ka be go ka se kgone go ba ye kaonana. E be e le ofisi ya godimodimo. E be e le ye kaonekaone lefase le bilego le yona. Gomme bodumedi bo mo neetše se sebesebe seo se bego se ka kgona go fiwa, sehlopha sa makgoba ka moleteng wa leraga. Gomme bjale, ge motho a be a lebeletše, ke lehlakore lefe a bego a ka le tše?

⁴⁷ A nke ke bolele se ka tlhokofalo, gomme ntle le bohlwele bjo bo itšego, eupša a nke ke bolele se gore le tla e kwešiša. Lehono, le se ke la lebelela kereke ye kgolo. Le se ke la lebelela kerekeleina ye kgolo. Le se ke la lebelela ba go apara gabotse. Eupša lebelelang Kriste, Yo a bego a humile gomme a ba modiidi, gore ka bohloki bja Gagwe o ke o dirwe go huma. Gomme ge o nyaka kereke, o se ye moo batsebalegi bohle ba yago, goba tše kgolo Ph.D.'s, goba D.D.'s, eupša lebelela fase godimo ga batho ba ba lebelelwago fase.

⁴⁸ Gomme Moshe, ge a bile le tšona ka bobeding bja diatla, bokaonekaone lefase le bego le ka bo fago, go se a bego a ka kgona go se lebelela. Gomme go le bjalo, ge a lebeletše go tše Disabonwego, tše mpempe kereke e bego e ka kgona go mo fa, o kgethile go sepela ka tumelo. Gomme o kgethile go sepela ka sa Gosebonwe, Modimo, a e tše go ba lehumo le legolwane go

feta pono ya gagwe yohle e ka kgonago go mo laetša. Mo go be go le mmušo, mo go be go le bogoši, mo go be go le terone, mo go be go le mphaphahlogo, mo go be go le se sengwe le se sengwe, ka seatleng sa gagwe. Eupša, go le bjalo, ka tumelo, ge a sware go getsola Kriste ntle kua ka meleteng ya leraga, o ile go batho ba gabo.

⁴⁹ Bjale, thuto ye nngwe ye nnyane še ka Moshe. Bjale, Moshe ga se a no dula morago le go re, “Ke kwela batho bao bohloko. Bao ke batho ba go loka. Le a tseba, nka se bolele lentšu le tee kgahlanong le bona.”

⁵⁰ Bjale, yeo ke tsela ye bontši bja borabodumedi ba dirago lehono, ge ba ekwa molaetša wa go gagamala ka Modimo wa kgontha. Ba tla re, “Oo, ga ke ne selo kgahlanong le batho bale ba ba dumelago go phodišo Kgethwa. Ga ke na le selo kgahlanong le batho bale ba dumelago mehlolo.” Eupša seo ga se sa lekanelia.

⁵¹ Moshe o be a no se ba kwele bohloko, le go dula teroneng. O ile ntle le go ba yo mongwe wa bona.

⁵² Gomme ke a elelwa, mengwaga e se mekae ya go feta, ge ke bile le kgoketšo ye kgolo le batho ba Baptist. Gomme morago batho ba Presbyterian, mohumagadi wa toropokgolo ye o be a lefa tsela ya ka go kgabola sekolo se sekopana ka go kerekeleina ya Presbyterian, gomme ba nyakile go ntseela ka gare bjalo ka modiredi. Eupša ge ke lebeletše ntle gomme ke bone gore sehlopha seo se dumetšego ka go tša kagodimogatlhago se be se segwa le go bitšwa “bapshikologibakgethwa,” go bile bonolo go tšwelapele, go ba moreri wa Baptist, gobane ke be ke le yena. Eupša sebakeng sa go ba lebelela le go re, “Oo, ga ke ne selo kgahlanong le bona. Ke dumela seo, le nna,” Ke kgethile go ba yo mongwe wa bona; ke ile ntle.

⁵³ Gomme bjale ke nna yo mongwe wa ba ba bitšwago “bapshikologibakgethwa,” gobane ke bona ka fale, ba ne leswao la Modimo yo a phelago le phela le bona, gomme ka tumelo ke a dumela gore seo ke sehlopha se tla yago ka go Tlhatlgo. Gomme bokaone ke be le Yona go feta tšohle tša diPh.D. le tša diD.D. tše kereke lefase e ka kgonago go di fihlelela. O se ba kwele bohloko. E ba yo mongwe wa bona. Moo ke ge, ka tumelo, o sepela ka tumelo, ka sa Gosebonwe. Ke bona Kereke e eya ka Tlhatlogong, ke bona Jesu a tlela Monyalwa wa Gagwe, ke bona sehlopha se sennyane sa batho ba ba hlokologilwego, ba ba segiwago, le go dirwa metlae, se eya ka Tlhatlogong, letšatši le lengwe. Bokaone ke be le bona go feta dihlopha tšohle tšeou ke tsebago ka tšona ka lefaseng lohle, ka gore ka tumelo re a bona, ka tša Gosabonwe. Kgontha.

⁵⁴ Moshe o kgethile go ba... O bone ka tumelo se ba bego ba le sona, le gore Modimo o be a tshepišitše, ka go mengwaga ye makgolonne, O be a tla ba namolela. Go le bjalo, O ile a

diega lebaka la mengwaga ye mengwe ye masomepedi, go le bjalo Moshe o Mo dumetše.

⁵⁵ Gomme lebaka le ke lego tšhemong, lehono, ka mosepelong wo, ke ka baka la gore, gore, ka tumelo. Bošegong bjo bongwe, mošola ka Green's Mill, Indiana, e ka ba mengwaga ye lesome ya go feta, Morongwa wa Morena, Yo a boletsego le nna go tloga bjaneng, o boletsé le nna ka dilo tše. Gomme ke ile ntle le go ikopanya nnamong. Makga a mantši nka se dumele go dilo tše ba di dirago, eupša go le bjalo, ke a dumela, fale go robetše Kereke ya Modimo yo a phelago. Gomme bokaone ke sepele ke nnoši, le batho ba se bakae bao ka kgonthe ba dumelago Modimo le go Mo tšea Lentšung la Gagwe, go feta go ba le dimilione ba ba Mo ganago. Nnete! Mediro ya bona e tla e dira.

⁵⁶ “Moshe o kgotleletše, bjalo ka ge eke o bona Yena Yo a sa bonagalego.” Gomme mafelelong a leeto la gagwe la bophelo... Oo, ke no rata go bolela se!

⁵⁷ Yo mongwe o kile a re go nna, o rile, “Mna. Branham, a o nagana Modimo o be a lokile, ge A dumelala Moshe lebaka la mengwaga ye masomenne le batho bale, gomme morago a mo ganetša go ya ka nageng ya tshepišo?” Eupša karolo ya letago ya kanegelo ya Moshe, o be a le ka nageng ya tshepišo, mengwaga ye makgolo seswai moragwana, le Jesu le Eliya, gomme ba bonwa godimo ga Thaba ya Karamele.

⁵⁸ E sego seo feela, eupša mafelelong a tsela, ge a be a eme thabeng, a šišinya šalang gabotse go batho ba gagwe, gomme o lebeletše go kgabaganya Jorodane, gomme o be a le lekgolo le masomepedi a mengwaga ka bokgale, ge mohemo wa gagwe wa mafelelo o thoma go mo šitiša, o nametše godimo ga leswika lela le iteilwego go tšwa lešokeng, gomme le be le gona, gomme ga se a... O bile le barwalalepokisi ba Morongwa ba ba mo tšeetšege felotsoko le go mmoloka, seo lefase le sa tsebego selo ka sona. Ka baka la gore, “O be a kgotleletše, a bona sa Gosebonagale.” Gomme ka iring ya lehu la gagwe, sa Gosebonagale se be se le fale. Ke a makala, ge nkabe a bile farao, ge nkabe go bile ka tsela yeo. Ke kamaka kudu. Eupša o be a na le nnete ge a tšere kgetho ya maleba.

Gomme o ka kgona go ba le nnete, ka go tšea kgetho ya maleba.

⁵⁹ Joshua, mengwaga ye masomenne moragwana, morago ga ge a tsene ka nageng ya tshepišo, gomme mo... go beng mogenerale yo mogolo wa sesole. Ge ntwa ya gagwe ya mathomo, manaba a gagwe a be a dirile leboto ka gare go lefelo moo go bego go se tsela go yena go fihla go bona. Eupša ka tumelo o lebeletše go tše Disabonwego, gobane Modimo o file Moshe tshepišo mola ba be ba sa le ka Egepeta. “Ke le file Palestina yohle.” Gomme ka tumelo o bone maboto a Jeriko a robetše go alega mobung. Gomme a matšha go dikologa le go dikologa, ka tlhamo ya go

tlala, a se ne go kamaka ka pelong ya gagwe, eupša a dumela gore Modimo o tla e dira. Gomme ge phalafala e galagaditšwe, gomme batho ba goelela, maboto a wele gomme ba tšere toropokgolo. Ka baka la eng? O bone Yena yo a sa bonagalego.

⁶⁰ Elelwang, pele a dira se, o be a sepela morago ga sekglela se sengwe, gomme o bone Monna yo a bego a eme kgahlanong le leboto, ka tšoša ya Gagwe e khwamotšwe. Gomme Joshua o khwamotše tšoša ya gagwe gomme o ile go kopana le Yena. Gomme o rile, “A o wa rena? A o wa lenaba?”

⁶¹ Gomme Monna o boletše morago gomme a re, “Ke nna Mokapotene wa Madira a Morena.” Joshua o tsebile gore ntwa e be e le ya gagwe nako yeo.

⁶² Gomme ge lena batho, fa, bošegong bjo, bao le lego sebe ka dipelong tša lena... Ga ke re gore o phela bootsweng. Ga ke re gore o a tagwa. Ke ra, *sebe* ke “gosedumele.” Gomme ka gosedumele ka pelong ya gago, ge o ka no bula pelo ya gago le go tswalela mahlo a gago, gomme wa lebelela Mokapotene Mogolo Yo e lego motlalagohle bošegong bjo, lefase le tla robala thwi maotong a gago, gomme o tla hlochlora tlemo ye nngwe le ye nngwe ya sebe go tloga go wena. Matšatši a go kamaka a tla be a fedile. Oo, a go šegofatšwe Leina la Morena!

⁶³ Ke boditšwe gore noga e kgona go tanya leihlo la nonyana, le go goketša nonyana yela, ka makatika a yona le go tsepelela mahlo a yona, go fihla, ka tsela ye bjalo, ge nonyana yela e ka fa noga šedi ya yona feela metsotso e se mekae, nonyana yela e tla phaphasela gomme ya golofala ka go felela. Gomme noga e tla tsea nonyana.

⁶⁴ Gomme ke kgona go dumela seo, ka gore ke tseba sephente ye nngwe, diabolo, gore ge a ka tsoge a tanya leihlo, ka makatika a gagwe, ka go šikinyega ka rokenrole ya sebjalebjale, le yohle meragelo ya lefase. Ge a ka tsoge a go tanya, lekgarebe goba lesogana, feela botelele go lekanelo go tsenya kgoketšo ya gagwe ka go wena, o tla phaphasela eupša o ka se kgone go tlemologa. O tla go swara go fihla a go metša ka sebeng.

⁶⁵ Tsela e nnoši, ke botšwago, gore nonyana ye nnyane yela e tsoge e be le sebaka, ke go tloša mahlo a gagwe go sephente. Gomme a ka se kgone go lebelela e ka ba eng gape, gobane o a ema, a tsepeletše. Eupša ge a ka tloša mahlo a gagwe go tloga go sephente, gomme a lebelela godimo gomme a pokapokiša diphego tša gagwe, o tla fofela kgole le phihlelelo ya noga.

⁶⁶ Gomme ge o kile wa ba le kgoketšo ya lefase le dilo tša lefase le gosedumele go goketša go dikologa pelo ya gago, seo se go botšago, “Oo, phela sebjalebjale,” šikinya hlogo ya gago, bošegong bjo, le go lebelela godimo go Yena wa Gosabonwe, Morena Jesu, gomme pokapokiša diphego tša gago tša thapelo go fihla o fofela thwi kgole le phihlelelo ya gagwe le ka ntle ga ditlemo tša gagwe.

⁶⁷ Ge a ka bolela le wena, gomme a bolela . . . gore, "Phodišo Kgethwa e fošagetše," šikinya hlogo ya gago go tloga go yena, ka pela. Ge a ka go botša, gore, "Tlhatho ya semoya ke go bala monagano," šikinya hlogo ya gago go tloga go yena, ka pela, gomme lebelela godimo go tša Gosebonwe.

⁶⁸ Boka Elisa a boditše Gehasi, mohlanka wa gagwe ka Dothane. Ge a be a lebeletše tikologong, go be go le sešole sa Basiria. Go be go le se sengwe le se sengwe go ba pšhatlaganya, gobane monna yo wa Modimo o be a kgona go botša kgoši ya Israele se kgoši ya Siria a bego a nagana ka sona ka kamoreng ya gagwe ya malao.

⁶⁹ A nke ke bolele se bošegong bjo, batheeletše ba ka. Modimo yola o sa phela, gomme O no swana bošegong bjo bjalo ka ge A bile nako yela. O sa ntše a ka kgona go tseba dikgopololo tša gaglo le se o naganago ka sona thwi bjale. Gona le swanetše go šetša dikenywa tša Moya, go bona ge eba ke Modimo wa histori yoo a tsogilego gape. Ka kgonthe.

⁷⁰ Gomme ge tlalelo ye kgolo e etla; ye ka mehla e dirago. Nako yeo ge Gehasi, a be a no ba leloko la kereke le bololo, ge . . . O be a se a bona se Eliya a se bonego.

⁷¹ Gobane, Eliya o be a tlwaetše go sepela ka tumelo, gomme o be a lebeletše go tša Gosebonwe, nako yohle. Gomme o tsebile gore Modimo o be a boletše, ka go Dipesaleme, "Barongwa ba Modimo ba dikaneditše bao ba Mmoifago." Seo se be se lekanetše go Eliya.

⁷² Eupša Gehasi o be a na le feela bo- . . . tsela seripa a e dumela. O be a no ba moleloko wa kereke.

⁷³ Kafao, Elisa o rile go Morena, o rile, "Morena Modimo, efa leswao fa. E no bula mahlo a monna yo gomme o mo dire a bone se se lego tikologong ya gagwe."

⁷⁴ Gomme ge Modimo a butše mahlo a gagwe, o bone dipere tša Mollo, di gogwa ke dikoloi tša Mollo, gomme tšohle di be di dikologile moprofeta yola wa kgale. Di be di le fale nako yohle, eupša o be no se di bone.

⁷⁵ Gomme bošegong bjo ke tla bolela selo sa go swana, gore, Modimo Yo a emego mošola ka go tema ya 1 ya Dipuku tša Ditiro; gomme ge A be a tšeelwa godimo, gomme mafaufau a bile ka tlase ga maoto a Gagwe. Jesu yola wa go swana o rile, "Bonang, Ke na le lena ka mehla. Nka se tsoge ka le tlogela goba go le hlokonomologa. Gomme mediro ye Ke e dirago le tla e dira ka mehla. Ke tla ba le lena, le ka go lena, go fihla bofelong bja lefase."

⁷⁶ Ke botšwa ke bafofishi ba ba fofisago tše fa, difofane tša ditše tša lebelo ka kgonthe. Gomme ba bolela gore sefofane, ge se fihla go lebelo le le itšego, gore se a roromela gomme se a šikinyega, gomme go bonala o ka re dipouto di ya go fofela ka

ntle ga sona, gore diphego di ya go tloga, go fihla ba feta sešitiši sa modumo. Eupša ka morago ga ge gatee ba fetile sešitiši sela sa modumo, ba re sefofane se no sesa, feela ka go iketla, ge se feta sešitiši sa modumo. Seo ke sešitiši se se lego ka tseleng ya sefofane, ge se feta modumo wa sona mong, gomme ka gona se kitima ka go iketla.

⁷⁷ Oo, ge Kereke ya letšatši le e ka tsoge ya rapela go fihla ba feta sešitiši sa sebe, le sešitiša sa gosedumele, ba be ba ka kgona go goletša phenyo ya Modimo yo a phelago, ge gatee ba feta sešitiši sela; ka go lebelela go tša Gosebonwe, le go dumelela lefase go roromela le go dira se le nyakago go se dira. Eupša go na le Modimo yo a phelago. Gomme ge re lahlegelwa ke gosedumele ga rena le gosedumele ga rena ka go Yena, le go feta lefelo leo lefase le rego, “Matšatši a mehlolo a fetile,” go go dira o šikinyege. “Oo, ga go selo se sebjalo bjalo ka kolobetšo ya Moya wo Mokgethwa,” go go dira o makale.

⁷⁸ Eupša ge o ka no lebelela go tša Gosabonwe, go Modimo Yo a e tshepišitšego, “Ka gore tshepišo ke ya lena le go bana ba lena, le go bona ba ba lego kgolekgole, le ba bantši ba Morena Modimo wa rena a tlogo go ba bitša.” Ge o ka lebelela go Lentšu le le šegofetšego le le rego, “Jesu Kriste o a swana maabane, lehono, le go ya go ile,” retollelang dihlogo tša lena go leba leo, gomme le phegelele, go fihla le feta mororomelo wola, go feta dišitiši tša gosedumele, le dišitiši tša sebe, le dišitiši tšohle tše di bonalago go le šitiša. Gona le tla fofa le lokologile ka go tumelo ya Modimo, le tseba gore dilo tšohle di a kgonega. Ka gona ga go magomo, ba re, le gatee, go lebelo le sefofane se tla yago. Ge go se ne magomo go lebelo sefofane se tla yago, ga go magomo go ditšhegofatšo tseo Modimo a tla di tšhollelagoo fase godimo ga modumedi yoo a tla dumelago. Lengwalo le Mo tleleima go ba “wa go swana maabane, lehono, le go ya go ile.”

⁷⁹ Jesu o rile, ge A be a le mo lefaseng, “Ga Ke dire selo ntle le ge Tate wa Ka a Mpontšha pele.”

⁸⁰ Ge mosadi mo sedibeng a etla go Yena, gomme o be a le Mosamaria. Sa pele, go bile le monna o tlide go Yena, gomme leina la gagwe e be e le Petro. Gomme O rile go monna yo, “Leina la gago ke Simone, gomme leina la tatago ke Jona.” O tsebile seo bjang? Mmetli yo wa fasefase wa Monazarene o tsebile bjang leina la monna yola e be e le Simone, gomme leina la tatagwe e be e le Jona? Gobane O be a hlamišitšwe ka Maatla ao a kgonnego go lebelela go tša Gosabonwe. Ga se a tsoge a lebelela mangwalo e ka ba afe a ngwadilwego. O lebeletše go wa Gosebonwe, Modimo wa Legodimo.

⁸¹ Ka pela, ba ile gomme ba hwetša monna yo mongwe, go dikologa thaba, yo a bego a tlide dimaele tše ntši. Gomme ge a mmoditše go bapa le tsela, se Jesu a se dirilego, ntle le pelaelo eupša se Nathaniele o be a kgokgona ka sona. Eupša ge gatee

pele ga Jesu, Jesu o rile go yena, “Bonang Moisraele yo ka go yena go sego bomenetša.”

⁸² Monna yo o e dirile bjang? Go be go se motho le Yena go re, “Mothaka yo ke Moisraele.” O e dirile bjang? Ga se A e bala go tšwa pukung ye e itšego. Eupša O lebeletše go sa Gosebonwe, go Modimo Yo a tsebago bofelo go tloga mathomong.

⁸³ Gomme o rile, “Rabi, O ntsebile neng?” go boletše Nathaniele.

⁸⁴ O rile, “Pele Filipi a go bitša, ge o be o le ka tlase ga mohlare, Ke go bone.” O be A dira eng? A lebeletše go tša Gosebonwe.

⁸⁵ Ge mosadi mo sedibeng, Mosamaria, o tlide ntle, gomme O rile, “Ntlišetše seno.”

⁸⁶ Gomme o rile, “Sediba se a sobeletša, gomme ga O ne selo go ga ka sona.”

⁸⁷ O rile, “Eupša ge nkabe o tsebile Yo o bego o bolela le yena, o be o tla Nkgopela seno.”

⁸⁸ Gomme o be a nyaka go tseba yo a bego a bolela le yena. Gomme o tsebile O be a le Mojuda, gomme O . . . O rile, “Ga se setlwaedi go lena Bajuda go kgopela rena basadi ba Samaria selo se sebjalo ka seo.”

⁸⁹ Gomme kafao poledišano e ile pele go fihla Jesu a swere moyawa gagwe. Gomme A re, “Eya o tšee monnamogatša wa gago, gomme le tle fa.”

O rile, “Ga ke na monnamogatša yo itšego.”

⁹⁰ Gomme O rile, “Yeo ke nnete. O ne bannabagatša ba bahlano. Gomme yo o dulago le yena bjale ga se monnamogatša wa gago.”

⁹¹ Gomme o rile, “Re a tseba gore ge Mesia a etla, O tla re botša dilo tše, eupša Wena o Mang?”

O rile, “Ke nna Yena yoo a boleLAGO le wena.”

⁹² Gomme a kitimela ka toropongkgolo gomme a re, “Etlang, bonang Monna, Yo a mpoditšego dilo tše ke di dirilego. A yo ga se Mesia?”

⁹³ Gomme ge Jesu, go tlogeleng lefase, ka morago ga bodiredi bja seo go dikologa lefase, go dikologa lefase la go tsebja la letšatši leo, O rile, “Mediro ye Ke e dirago, le tla e dira le lena.” Theetšang go tloga ga Gagwe. “Bonang, lebakana le lennyane, gomme lefase (la go bonagala, la bohlale, la go hlamega, la saense), lefase le ka se Mpone gape.” Seo ke seprofeto tlwa. E ka se kgone go thuša eupša go ba Therešo. Jesu Kriste o e boletše. “Modumedi wa bohlale, lefase, le ka se Mpone gape. Efela, lena le tla Mpona, gobane Ke tla ba le lena, ebile ka go lena, go fihla bofelong bja lebaka. Gomme mediro ye Ke e dirilego, le tla e dira le lena. Gomme ye e fetago ye le tla e dira, ka gore Ke ya go Tate wa Ka.”

⁹⁴ Modimo le Tate yo mogolo yo yoo re bolelago ka yena, ga se se sengwe seo se bilego. Yena ke se sengwe seo se lego. Gomme ge batho ba Gagwe, Ba ba bitšwago ka Leina la Gagwe, ba ka feta sešitiši sela sa se lefase le swanetšego go se bolela, se kereke e swanetšego go se bolela, se saense e swanetšego go se bolela, le go lebelela go se Modimo a swanetšego go se bolela; motsotso woo, o tla feta mororomelo wola wa gosedumele gomme wa lokologa, go tšwa moagong wo, bošegong bjo, go no thaba ka mo o ka kgonago go ba; o direla Modimo, o ikwa o lokologile, dibe tšohle di ile, o fodile go tšwa bolwetšing bja gago. Gobaneng, go tla makatša! Modimo o be a ka se be Modimo wa toka, yo a bego a tla putsa motho o tee ka tumelo ya bona, gomme a se putse yo mongwe. A ka se kgone go e dira. Ge Modimo a tlošitše leukemia go tšwa go mosetsana yola ge a be a robetše mošola; gomme se sengwe sa dipetlele tše kaonekaone, Johns Hopkins, seo se bego se ka kgonago hwetšwa; gomme matsogo a gagwe a ewa go tloga go yena. Gomme iri e tee ka morago ga ge thapelo e dirilwe mo, ngwana yola o begilwe “go phelega le go fola,” ke dingaka tša go swana.

⁹⁵ Modimo a ka se kgone go ba toka, a dira Congressman Upshaw, yo a bego a le ka setulong sa bagolofadi lebaka la mengwaga ye masometshela tshela, a robegile ka mokokotlong wa gagwe, a sepela boka Mna. Roosevelt, gomme o tla fodiša monna yola le go mo ntšha ka setulong sela, ka pono, gomme ge monna yo mongwe a dutše ka tsela ya go swana, gomme a kopane le tumelo ya go swana, Modimo o be a tla hloka toka go fodiša yo motee le go tlogela yo mongwe a mnoši. O lokile.

⁹⁶ Ke rena, bagwera. Ge re ka kgonago sepela go feta sešitiši sela sa modumo! Ge re ka kgonago fihla lefelong mo e sa dirego phapano ye e itšego ke mang a e bolelago! Ge feela Modimo a rile ke Therešo, sesa go ya pele.

⁹⁷ Ka mehla ke be ke gopola ka sereto se sennyane sela ka pukung ya ka ya sekolo, ge ke be ke sa le mošemane yo monnyane godimo mo tseleng. Bontsi bja lena banna le basadi ba mengwaga ya ka le a se elelwa. “*Sesela Pele! Sesela pele le pele!*”

⁹⁸ Ge Christopher Columbus a filwe dikepe ke kgošigadi ya Spain, gomme o be... gobane, ka pelong ya gagwe, o bone pono gore lefase le be le le ntikodiko. Gomme o be a se ne tsela ye a bego a ka e netefatša. O be a se ne selo go e dira ka sona, eupša o be a le monna wa pono. O e dumetše.

⁹⁹ Gomme ge sekepe se filwe yena, le sehlopha sa bagolegwa, mafšega; bao e be e le maloko a kereke ya gagwe, sehlopha sa magogelamorago, sehlopha se se bego se nolegile moko gomme se lekile go mo nola moko. “Feela nakwana ye nnyane boteletšana gomme re tla rotha go tloga lefaseng. Sephente e tla tsoga go tšwa botebong bja lewatle, gomme ya phuthela dikepe tše nnyane tše

le go se gogela botebong. Bjale se re, mosesi yo bogale, se re! O tla reng?"

O rile, "Sesela pele! Sesela pele! Sesela pele le pele!"

¹⁰⁰ Modimo, re fe banna ka Kerekeng, ba go swana le bale. Ga ke kgathale se lefase la saense le se bolelago. Ga ke kgathale se lefase la kerekeleina le se bolelago. Ke tsea Modimo Lentšung la Gagwe, gomme ke sesela pele. Sesela pele, go fihla o feta sešitiši. Re be re tlwaetše, ka kerekeng ya kgale mo, re be re tlwaetše go opela pina ye nnyane ye ka mokgwa wo:

Ke tshetše mothalo wa go aroganya,
Ke tlogetše lefase morago.

¹⁰¹ Ge go kile gwa ba nako ye Kereke e hlokago go gata go kgabaganya mothalo woo wo o go aroganyago gare ga tumelo le gosedumele, ka pono, le go lebelela go tša Gosabonwe ka tumelo, ke bjale. Moo ke ge o tlogela se sengwe le se sengwe morago ga gago, tlhokomelo ye nngwe le ye nngwe, go lapa go gongwe le go gongwe, se sengwe le se sengwe seo se bolelago gore o ka se be Mokriste, "Ke kgogile botelele kudu. Ke nwele botelele kudu. Ngwaneshu Branham, ke phetše ka bootsweng." Ga ke kgathale se o se bolelago le se o se dirilego, le ge dibe tša gago di le tše khubedu; o kile wa tshela mothalo wola wa sešitiši, wa diabolo a leka go go tlaiša, a re o ka se kgone go e dira, o ka se kgone go e dira. E re, "Ke tla kgona go e dira, ka gore Jesu o rile, 'Mang kapa mang a ratago, a nke a tle gomme a nwe go tšwa meetseng a mothopo wa Bophelo, mahala.'" E tlogele morago.

¹⁰² Ge lena batho bao le babjago, le lemile go kgabola mothalo wa thapelo ka morago ga mothalo wa thapelo, gomme le rapeletšwe, o bile go dingaka, o dirile se sengwe le se sengwe, gomme go le bjalo lehu le dula lebating la gago. Ge o fihla lefelong moo o rego, "Ga ke kgathale se ngaka a se bolelago. Ga ke kgathale se lefase la saense le se bolelago, Jesu Kriste o dirile tshepišo go nna." Feta sešitiši sela sa meroromelo go soulo ya gago, gore o lokologile. Ga go selo se tee go go šikinya. O tla sesela ka go phodišo ya gago feela ka kgontha bjalo ka ge ke eme mo phuluphithing ye. O ka se tsoge wa retologa go lebelela ka tsela yela gape. O tla be o lebeletše ka tsela ye.

¹⁰³ O lokologile kudu go tšwa go tšona dilo: O re, "Matšatši a mehlolo a fetile. Ga go selo se sebjalo bjalo ka phodišo Kgethwa. O ka se fole. Taba ya gago ke ye mpe kudu." Sesela pele, godimo ka godimo ga lona. Namela maboto mošola, go fihla bohole ba lokologile, thapo ye nngwe le ye nngwe le tlemo ye nngwe le ye nngwe e ripelwe go tlemologa, mororomelo wo mongwe le wo mongwe o tlogetše ka morago, gomme o lokologile, le go lokologa ka nnete.

¹⁰⁴ Jesu Kriste, Morwa wa Modimo, o beile ka Kerekeng, bakeng sa lena batho, bakeng sa dilo tše bjalo ka tše. Sa pele O beile baapostola, morago, ka morago ga fao, O rometše baprofeta,

morago barutiši, badiša, le baebangedi, go tiišetša Lentšu le, go netefatša gore Yena ke morutiši tsoko yo mogolo. Ga ke re gore o swanetše go ba le Ph.D. A ka no tseba gannyane ka Beibebe go feta—go feta ngwana yo a sa lego ka go mahlalagadi a gagwe. Jesu o tsebile bontši ka ga Mangwalo, ka bogolo bja mengwaga ye lesomepedi, go feta ka mo Bafarisei bohle ba dirilego, goba dihlalefi tša kgale tša go rutega. Kafao, le a bona, ga go tšee monagano wa bohlale. Go tšea pelo ye e neetšwego go thato ya Modimo.

¹⁰⁵ Ge Jesu Kriste, Morwa wa Modimo, a tshepišitše, Beibebe ye, gore, “O tla pholosa go fihla kgolekgole.” Ge A tshepišitše, “Dilo tše Ke di dirago le tla di dira le lena. Ke tla ba le lena go fihla bofelong bja lefase.” Gomme ge Jesu yola wa go swana a ka kgona go tla bosegong bjo, le go re tšeela ka taolong ya Gagwe, gomme re ka kgona go ipea renabeng go se nagane ka fao e yago go dirwa, eupša go lebelela ka go Disabonwego, go Modimo Yo a e tshepišitšego. “Selo sa go swana seo Ke se dirilego go mosadi mo sedibeng, Nka kgona go se dira ka wena. Leswao la go swana le Ke le laeditšego go lefase, go bobedi Mojuda le Mosamaria, Ke tla le laetša gape ka matšatšing a Bantle.” Ge A e dirile go bona, le go inetefatša Yenamong go ba Mesia ka mokgwa woo, gomme a tla a dira e ka ba eng ye nngwe gomme a re lesa go tsena ka gare ka bohlale, e be e ka se be botse. O be a ka se be Modimo wa toka. O swanetše go bontšha leswao la go swana. Ge A be a ka tla bosegong bjo, le go roromela go kgabola moago wo le go ipontšha Yenamong, gore O a phela, ka go dira maswao a go swana, e swanetše go dira pelo ya modiradibe yo mongwe le yo mongwe go tologa ka gare ga gagwe. E swanetše go dira motho yo mongwe le yo mongwe a babjago go phagama ka maoto a bona le go Mo fa letago, le go feta mothalo wo mongwe le wo mongwe wa mororomelo, le go sepelela pele ka go dikanala tšela go moo Modimo a ka go fodiša le go go dira o fole.

Naganang ka dilo tšeou ge re rapela.

¹⁰⁶ Modimo wa Kgaogelo le wa Gosafelego, Yo a bego a le Modimo pele go be go le athomo ka moyeng, gomme e tla ba Modimo ge go se athomo ye nngwe. Wena Yo a bopilego lefase le go le bea ka diatleng tša Gago, le go le tšhollela ntle ka lefaufaung, gomme wa re, “A go be le seetša,” gomme gwa ba seetša. Mantšu a Gago a ka se palelwé, gomme Le ka se kgone go palelwé bosegong bjo, ka gore O dirile tshepišo. “Maswao a a tla latela bona ba ba dumelago.” Lentšu leo ke therešo. Morena Modimo, re a tseba gore phodišo e bile se sengwe seo se rekilwego kua Khalibari, feela bjalo ka ge pholosa e bile. Gomme re ba go lebelela le go phela, le go dumela, le go feta dišitiši, go netefatša go Wena gore re hlokofetše. Modimo Ramaatlakamoka, efa, bosegong bjo, gore batho ba ke ba dumele, gomme ba pholoswe go tloga dibeng tša bona le malwetši a bona. Gomme ke tla kgopela gore O tla dira se bakeng sa letago la Modimo.

¹⁰⁷ Gomme ge re sa ne dihlogo tša rena di inamišitšwe, ke no makala, bošegong bjo, ke ba bakae ka gare le ka ntle, ba tla ratago go dira boipolelo bjo go Modimo. “Morena, ke—ke bile moleloko wa kereke lebaka la nako ye telele, goba mohlomongwe ga se ke be. Eupša, ka kgonthé, go na le bontši kudu bja lefase bo roromelago go nna. Ke ne, oo, se sengwe seo se no se ntumelelego go fihla lefelong moo nka kgonago go dumela boka ke swanetše go dumela. A O ka tloša seo go nna, bošegong bjo, Morena? Gomme a nke ke fete sešitiši sa sebe sa gosedumele.” A le ka phagamišetša diatla tša lena go Yena? Modimo a go šegofatše. Seo se lokile. Oo, diatla tše ntši, gohle go dikologa.

¹⁰⁸ Morena, O bona diatla tša bona. Gomme a nke Moya wo Mokgethwa, wo bjale o ba boditšego go phagamiša diatla tša bona, a nke A tle le go ba lokolla go tšwa go meroromelo ya lefase, go fihla ba kgonago fihla mošola wa kg—kg kgolofalo ya kgokakgoketšo ya sephente, gore go loma ga nogga ga sebe, makatika a lefase le la sebjalebjale a ka se sa ba goketša gape. A nke ba phagamišetše mahlo a bona go Kriste feela bjale le go Mo amogela bjalo ka Mophološi wa bona, gomme re tla Go tumiša. Leineng la Jesu re a rapela.

¹⁰⁹ Gomme bjale, pele re bitša balwetši le batlaišwa, a go ne ba bangwe ka fa bošegong bjo, ba ba babjago, ba tlaišegago ka tsela e ka ba efe, ba ba bego ba tla re, “O Modimo, ntumelele go feta mothalo wa sešitiši, le nna. Mphe tumelo go no ya pele go feta dikgopololo tšohle tša diabolo tše di rego, ‘Ga o ye go e kgonago. O ka se kgone go E hwetša’”? A o ka phagamiša diatla tša gago, le go re, “Modimo, nkgaogelete.” Modimo a le šegofatše. O bona diatla tša lena tšohle. Di gohlegohle moagong.

¹¹⁰ Bjale, Tate, efa gore se sengwe se tla direga, bošegong bjo, seo se tla dirago batho ba go bona gore ye ke Therešo, Lentšu la Modimo, le gore O tla boloka tshepišo ya Gago go bona, feela go swana le ge O dirile go Abraham, goba go Moshe, goba go e ka ba mang. Ka fao, ge O boditše Petro, “Sepelela go Nna, godimo ga meetse.” Gomme ga se a ke a fihla fase go bona gore ke mohuta mang wa leporogo o bego o le ka fase ga meetse. Ga se nke ebile a lebelela seo. O lebeletše Jesu. Eupša ge a išitše mahlo a gagwe go maphoto, o be a tla nwelela. Modimo, re a rapela, bošegong bjo, gore bao ba gatelago ntle, bošegong bjo, ba tla feta sešitiši sela sa maphotho, gomme ba tla sepelela thwi pele go Jesu, ka taeletše ya Gagwe ya go tla. Re kwe, Morena. Gomme bjale efa mohlanka wa Gago bohlale go tseba se o ka se dirago ka iri ye, se se tla tlišago ditšhegofatšo, phološo ya phodišo, bobedi mmele le semoya, Leineng la Morena Jesu. Amene.

Ke a Go leboga.

¹¹¹ Bjale go lena ba le phagamišetše diatla tša lena. Ke ya go le kgopela se sengwe. Ke ya go fetola tirelo feela gannyane,

bošegong bjo. Bošegong bja go feta re ba tšeetše ka kamoreng. Bošegong bjo, re ya go leka go ba lokologanya, le go tliša sehlopha sefaleng. Morago, ka pela ka morago ga ge tirelo ye e fedile, ge modiša a tsea tirelo, ke ya go kgopela, lena ba le phagamišitšego seatla sa lena, batho tsoko ba masomepedi goba masometharo, ke nyaka le tle gomme le khuname mo aletareng ye, ge ka kgonthe o be o e era ge o phagamišitše seatla sa gago. Le a bona, Modimo o tla e dira, ge ka kgonthe o be o e era, gomme o tla no bolela le go re, “Morena, tsea mororomelo wo mongwe le wo mongwe wa gosedumele go tloga go nna.” O tla e dira.

¹¹² Le a bona, o ka se kgone go tšhaba o lokologile. O ka se kgone go e dira ka lefaseng la saense, ka sefofane. O ka se kgone go e dira ka go lefase la semoya, ka moyo, ge feela dikgopololo tša gago tša setho le dikgopololo tša bohlale, ke bolelago ka tšona, di sa go swere. “Gobaneng, ke . . . kereke ye ga e dumele Leo. Kereke ye . . .” Le se naganeng seo. Jesu o be a le Yena Yo a e boletšego. Gomme kereke ye e go botšago gore, “Ke phošo,” ke seprofeto sa maaka. Ga ke bolele seo go ba le swele, eupša ke bolele seo go botega, gobane ke tla swanela go ema le lena mo Kahlolong. Barutiši bale, ba ba rutago dilo tšela, ba phošo. Bjale a nke . . .

¹¹³ Go no le laetša se Jesu a se boletšego, gona re tla bona selo se segolo, ge se ka kgona go dirwa. Ke a thanka go na le batho ba makgolopedi mo go rapelelwia. Ke nyaka go le botšisa se sengwe, godimo ga molaetša wo bjale, wa *Go Lebelela Go Tše Disabonwego*. Ge Yena wa gosebonwe a ka ipega Yenamong go bonala, gona e swanetše go dira soulo ya gago e fete sešitiši se sengwe le se sengwe. Ge Yena wa Gosebonwe, a ka itira Yenamong go bonagala mo go wena, gobane O tshepišitše O be a tla e dira. Bjale elelwang, ka go . . .

¹¹⁴ Ke rena Bantle. Bjale, ge A be a le lefaseng, go be go se yo motee a Mo lebeletšego eupša Bajuda le Basamaria. Rena, Maanglo-Saxon Bantle, re be re sa le bahetene. Re be re rapela medimo ya diswantšho; botate ba rena. Eupša Bajuda ba be ba Mo lebeletše, gomme Basamaria ba be ba Mo lebeletše. Gomme O tlide le go netefatša gore O be a le Yena yoo ba bego ba mo lebeletše, gomme ga se ba Mo dumela. Eupša go be go le ba bangwe ba bakgethiwa ba Mo tsebilego gomme ba Mo lemoga; mmogo Mojuda le Mosamaria. Bjale go tla swana le Bantle. Bjale, ka tsela ye A itirilego Yenamong go tsebja go Mojuda le Montle, gore O be a . . .

¹¹⁵ Bjale, ba rile, “Le—le ya go Mmolaya bakeng sa eng?”

O rile, “Ka gobane gore Yena ke Motho, a itira Modimo Yenamong.”

¹¹⁶ O be a le bobedi Modimo le motho. Modimo o be a le motho wa ka gare. Jesu o be a le motho wa ka ntle. Ka ntle . . . Jesu o rile, “Ga Ke dire selo ka go Nnamong eupša se Ke bonago Tate wa Ka

a se dira.” Mang kapa mang o tseba seo. “Se Tate a Mpontšhago, seo ke se Ke se dirago.”

¹¹⁷ Bjale šetšang ka fao A ikwalakwaditšego Yenamong go batho ba Bajuda; ka go botša Petro gore o be a le mang, ka go botša Nathanièle gore o be a le mang le se a se dirilego pele a etla. Yeo ke tsela. Gomme ba rile, “Wena . . .” Nathanièle o rile, ge a kwele seo, o rile, “Wena o Kriste, kgoši ya Israele.”

¹¹⁸ Eupša Mojuda wa gosedumele o rile, kereke lefase, o rile, “Yena ke ramemoya. Yena ke diabolo. Yena ke Beletsebubu.”

¹¹⁹ Jesu o rile, “Le bolela seo kgahlanong le Nna, se tla lebalelwā lena,” gobane ba be ba le Bajuda. “Eupša, go sego bjalo, ka matšatšing a mafelelo ge Moya wo Mokgethwa o etla godimo ga Bantle, lentšu le tee kgahlanong le Wona le ka se tsoge la lebalelwā, ka go lefase le goba go lefase le le tlago,” ge Moya wo Mokgethwa o etla go dira selo sa go swana seo A se dirilego, gobane Moya wo Mokgethwa o tla bea bohlatse bja Gagwe. Kafao re ipea renabeng ka go seemo sa go hlubaetša.

¹²⁰ Bjale, a le a dumela gore Modimo o sa le Modimo yo a phelago? A le a dumela gore re phela ka matšatšing a mafelelo a lebaka la Bantle? Gomme dikereke di Mo lebeletše go tla? Gomme a le a dumela O ba dira komana bakeng sa go Tla ga Gagwe? Meriti ya go Tla ga Gagwe e lahletšwe godimo ga lefase; bothata, tlalelo, nako ye thata.

¹²¹ Gomme moriti wa go Tla ga Gagwe o beilwe godimo ga Kereke ya Gagwe. Gomme dilo tše tseo re di dirago Leineng la Gagwe e no ba moriti wa se A tla se dirago ge A etla. Ge re bona ngwana a robetše fale, a ehwa ka leukemia, a otlolletšwe morago bophelong mo metsotsong ye mehlano, woo ke moriti wa ge A etla. Lerole le le lego lefaseng le tla tsoga ka bobotse bja boswa gape. Wo e no ba moriti, eupša ke go go dira o tsebe gore O etla. A re tlemolleng gomme re beeleng thoko tlemo ye nngwe le ye nngwe bjale.

¹²² Gomme ge A ka tla, bošegong bjo, gomme a dira dilo tša go swana tše A di dirilego go mosadi ka Samaria le go Mojuda, a lena Bantle le tla Mo dumela, gomme la lesa disoulo tša lena di tlemologile? A le tla e dira? Phagamišetšang diatla tša lena go Yena, le re, “Ke tla dira.”

¹²³ Bjale ga re kwešiše, ge re re “phodišo,” ge re re “phološo.” Ga go motho a ka go phološago. Ga ke kgathale se a se dirago, a ka se kgone go go phološa; a ka se kgone go go kolobetša go lekanelā ka meetseng. A ka se kgone go dira selo go go phološa. Kriste o a go phološa. Eupša o go diretše tsela go phološwa. A ka kgona go rera Lentšu, a ka kgona go kolobetša ka meetse, eupša Kriste o kolobetša ka Moya wo Mokgethwa. Seo ke se Johane a se boletšego, “Ke kolobetša ka meetse, eupša Yo a tlago ka morago ga ka o kolobetša ka Moya wo Mokgethwa le Mollo.” Jesu o kgona go laetša maswao a Gagwe a Yena go beng mo, a rera Lentšu la

Gagwe ka modiredi, le go tla fase le go hlatsela Lentšu leo ka Yena go beng mo; eupša ke tumelo ya gago ye o fodišitšwego ka yona. Le a bona?

¹²⁴ Bjale a re nong go ba le tlhomphokgolo ka mo re kgonago go ba; gomme, hle, bjale, hle. Ga ke bolele gore O tla e dira. Eupša re ya go bitša mothalo wo monnyane wa thapelo godimo fa. Gomme go ne sehlopha ka fa, ke a nagana, ge ke sa phoše, ba mpoditše ba file ntłe dikarata tše lekgolo. Seo se ra gore go na le batho ba lekgolo ba dutše mo go rapelelwa. Re tla ba fihlelala, yo mongwe le yo mongwe. Ge o no se nolege moko le go tšhaba, re tla fihlelala yo mongwe le yo mongwe wa lena. Le a bona? Re ka se kgone go ba tliša bohole ka nako e tee, ebile re ka se kgone go ba emiša bohole ka nako e tee. Eupša re ka kgonago go emiša ba bangwe ba bona ka nako, mohlomongwe ba bane, ba bahlano, goba ba tshela, eng kapa eng re ka kgonago go e hwetša sefaleng go dikologa mo, goba godimo le tlase lehlakoreng, moo re ka kgonago go ba emiša, gobane ga re ne seksgoba. Eupša ge Modimo a ka ba direla bjalo ka ge A dirile, go netefatša Yenamong gore O fa, gona re swanetše go lebelela go tše Disabonwego nako yeo le go dumela.

¹²⁵ Bohle lena batho ba go babja bao le phagamišitšego seatla sa lena, ge Jesu a ka tla le go dira selo sa go swana seo A se dirilego ge A be a le fa lefaseng, ka mebele ya batho . . .

¹²⁶ Ke ile ka makala letšatši le lengwe, ge ke bona yo mongwe wa barutiši ba bagologolo, ke ile ka gopola, lefaseng. Ke monna yo mogolo. Le se nkwele thoko. Billy Graham, yo Morena a mo šomišago, monna yo mogolo. Eupša e be e le ntsekana ka pampiring, gore ba bangwe ba . . . yo mongwe felotsoko o be a mo ngwaletše, gomme a nyaka go tseba, “Go reng ka thrinithi? A go be go le, nnete, Bomodimo ba bararo, goba a go be go no ba Modimo yo motee?”

¹²⁷ Gomme Billy Graham o mo arabile, gomme o rile, “Ga se ešo ya utollwa.” Re ne pampiri ye.

¹²⁸ Oo, ngwanešu, o se tsoge wa dumela go ne Bomodimo ba bararo. Go ne Modimo o tee a mnoši. Go ne diofisi tše tharo tša Modimo o tee yola. Botate, Bomorwa, le Moya wo Mokgethwa; Modimo a theoga go tšwa Legodimong. O dutše thabeng, ka Pilara ya Mollo. O tlide fase gomme a dirwa nama gomme a dula magareng ga rena, ka go Bomorwa, go tšwa go Botate. Gomme bjale o dula ka Kerekeng ya Gagwe, bjalo ka Moya wo Mokgethwa. Modimo wa go swana! E sego Bomodimo ba bararo. Modimo wa go swana! Le a bona? Modimo wa go swana!

¹²⁹ Bjale, lebelelang, ge A be a le mo lefaseng. Theetšang sekgauswi bjale. Ge A be a le mo lefaseng, O boletše se, “Lebakana le lennyane, lefase le ka se Mpone, efela lena le tla. Ke tšwa go Modimo, gomme Ke boela go Modimo.” Ke ba bakae ba tsebago Lengwalo le bolela seo? Gabotse, se A bego a le sona ge A be a le mo lefaseng, gona O swanetše go be a boile morago

go dira go swana. “Gomme lebakana le lennyane, gomme Ke tla ba le lena, ebole ka go lena. Gomme mediro ye Ke e dirago le tla e dira le lena.” Le a bona? Seo se Mo dira wa go swana. Lekala lela la go swana, le no tšwelapele le eya pele ka ntle ga Morara. Le a bona? Le a bona? Lekala le letee *mo*, lebaka le lengwe la kereke *mo*, le lengwe *mo*; ke makala go tšwa go Morara. Bjale Mo hlokomeleka go lekala kua.

¹³⁰ Ge A be a le mo lefaseng, O rile O tšwa go Modimo, e bego e le Pilara ya Mollo, gomme O rile O boetše morago go Modimo.

¹³¹ Ka morago ga lehu la Gagwe, poloko le tsogo, Paulo o be a le tseleng ya gagwe go theogela Damaseko, gomme Sengwe se mo rathetše fase. Le elelwa seo? Ditiro, tema ya 8, ke a dumela. Gomme ge a lebeletše godimo, Pilara yela ya Mollo ye e bego e le ka lešokeng, Jesu Kriste o be a retologetše morago go Pilara ya Seetša ye e timilego mahlo a gagwe. A yeo ke nnete? Nako yeo O be a boetše go Modimo. Gomme Paulo o rile . . .

O rile, “Saulo, Saulo, o Ntlhomaretše eng?”

O rile, “O Mang, Morena?”

O rile, “Ke nna Jesu.” O be a le Pilara ya Mollo.

¹³² Ke bolela se go tabarenakele, e sego go nyefola, eupša a le a tseba Yena yola wa go swana, Moya wola wa go swana, o ne rena bjale? Re na le seswantšho sa Gagwe se lekeletše mo, ka lefase la saense. Gomme maswao ao A a dirilego morago kua, a laetša gore O sa phela ka Kerekeng ya Gagwe; e sego mohuta wo mongwe wa leswao, eupša leswao la go swana. “Lebakana le lennyane, gomme lefase ga le sa Mpona gape,” bohlale, “eupsa, lena,” ba le fetilego sešitiši sa lešata, go dumela Lentšu, “le tla Mpona.” Ke a holofela gore le ka go “bolena” bošegong bjo.

A re rapeleng.

¹³³ Morena, bjale, tirelo ka moka, e swanetše go ba Wena, ka morago ga mantšu a mabjalo ka a, go tiišetše gore O boletše Therešo. Ke a rapela gore O tla fa ditšhegofatšo tše, ka Leina la Jesu Kriste. Amene.

¹³⁴ Bjale ke ba bakae . . . Lena ka dikarata tša thapelo ka fa, re ka se kgone go le emiša bohole gatee. Eupša ge o ka no se nolege moko, bošegong bjo, gosasa bošego, Lamorena le Lamorena bošego, go ya pele, re tla go fihlelela. Eupša bjale a re thomeng bošegong bjo, gomme re thome go tliša feela ba se kae godimo. Gomme bao ba nago le dikarata, ba ba sa kgonego go sepela, ke tla le bitša ka o tee ka o tee le go le bea mo. Ge o sa kgone go sepela, ge ke bitša nomoro ya gago, gona phagamišetša seatla sa gago godimo, gomme ka gona ba bangwe ba diašara mo ba tla tla le go go rwala. Go lokile.

¹³⁵ Karata ya thapelo nomoro tee, ke mang a nago le yona? Phagamišetša seatla sa gago godimo ge o na le karata ya thapelo nomoro tee. Phagamišetša seatla sa gago godimo.

Nnete. Yo mongwe mohlomongwe a ka se kgone... Gabotse, mohlomongwe ke be ke le phošo. Billy o kae? Mohlomongwe e be e le... Eng? [Yo mongwe o re, "Yena?"—Mor.] Ee, go lokile. Ge o ka kgona go sepela, mohlomphegi, etla thwi godimo mo.

¹³⁶ Karata ya thapelo nomoro pedi. Ge o ka kgona go phagamiša diatla tša gago, phagamiša seatla sa gago. Go lokile.

¹³⁷ Nomoro tharo. Thwi fa, a le ka tla thwi fa, ge le ka kgona. Bjale, ge o sa kgone, e no tšwelapele o šišinya seatla sa gago, gomme ba bangwe ba bona ba tla tla go go rwala. Nomoro tharo.

¹³⁸ Nomoro nne. Letere yela ke eng? [Ngwanešu o re, "J."—Mor.] J? Go lokile. Nomoro nne, a o ka phagamiša seatla sa gago. Mohumagadi ka morago, o šetše a le go maoto a gagwe.

Nomoro tlhano.

¹³⁹ Bjale ge Billy a etla tlase go fa ntle dikarata tša thapelo, goba Leo, goba Gene, Ngwanešu Wood, goba e ka ba mang a di fago, ba tla godimo fa pele ga lena, le go hlakanya dikarata tše, mmogo, le go no go fa karata efe kapa efe ya thapelo o e nyakago. Le a bona? Seo se tšwa go wena, e no hwetša karata ya gago. O ka no... Yo a dutšego kgauswi le wena a ka no ba le nomoro tee, wa go latela a ka ba le nomoro lesomethlano, morago godimo fa a ba le nomoro pedi. Di no ba di hlakahlakane. Go lokile.

¹⁴⁰ Karata ya thapelo nomoro tharo, ke mang a nago nayo? [Yo mongwe o re, "Godimo kua."—Mor.] Godimo mo? Go lokile.

Nomoro nne.

¹⁴¹ Nomoro tlhano. [Ngwanešu o re, "Ke na le nomoro tlhano."—Mor.] Nomoro tlhano.

¹⁴² Nomoro tshela. Moragorago ka morago, go lokile. Ge le ka rata, morago fale, nno dumelang lekgarebe lela go kgabola.

¹⁴³ Nomoro šupa, a o ka phagamiša seatla sa gago. Ya gago ke nomoro šupa, kgaetšedi? Go lokile.

¹⁴⁴ Nomoro seswai, a o ka phagamiša seatla sa gago, ge o ka kgona. Mohumagadi thwi fa, nomoro seswai. Go lokile, kgaetšedi, tšea lefelo la gago.

Nomoro senyane. Mohumagadi yo fa. Go lokile, kgaetšedi.

¹⁴⁵ Nomoro lesome. [Yo mongwe o re, "Thwi fale mo khoneng."—Mor.] Go lokile. Nomoro lesome. A re—a re e khutšišeng ka seo, ka baka la gore re ba pitlagano fao gannyane nthathana. Ge ba ka no sepelela morago feela gannyane nthathana, hle. Gabotse, re tla hwetša lesome. Bjale, ke a thankā... O ne lesome, a o a dira, kgaetšedi? Ge o ka kgona go sepela thwi go bapela, bakgomana bale thwi fao, ba tla go dumelala ka mothalong. Bjale, go lokile.

¹⁴⁶ Ke ba bakae? [Yo mongwe o re, "Senyane."—Mor.] Nomoro senyane o a hlokega. [Ngwanešu o re, "Aowa. Thwi fa, Ngwanešu Billy."] Oo, fao—fao, a ka se kgone, oo, ge a ka se kgone go sepela,

e nong go mo tlogela a dule kua gomme a mo tliše ge nomoro ya gagwe e bitšwa. Loka. Feela ge nomoro ya gago... Ge o sa kgone go ema botelele kudu, kgaetšedi, e no leta go fihla nomoro ya gago e biditšwe, gona o ka kgona go tla. Seo se lokile. Go lokile, nno—nno dula. Seo se lokile. Bjale, ge a sa kgone go sepela, gabotse, ge nomoro ya gagwe e biditšwe, ba bangwe ba bona ba tla mo rwalela fa, goba e ka ba eng gape. Seo se lokile. Go lokile.

¹⁴⁷ Nomoro, dinomoro tše dingwe re bego re di hlaelelwa ke eng? [Ngwanešu o re, “Tše ke tšona tšohle.”—Mor.] Yeo ke phetho. Go lokile. Bjale re ne ba bakae? A bjoo ke bofelo bja mothalo thwi fale? Gabotse, go lokile.

¹⁴⁸ Bjale, ke nyaka go tseba gore lena bohole ka mothalong wo, ba le emego ka mothalong mo bjale, ke nyaka go le botšiša potšišo ye. A ka potego le dumela gore Jesu Kriste ke Morwa wa Modimo? Gomme le a dumela gore O tsogile go tšwa bahung? Gomme ga se A hwa bjale, eupša O a phela. A le dumela gore—gore A ka kgona go diragatša le go dira go swana le ge A dirile ge A be a le mo lefaseng? Gomme o a dumela gore O rometše Moya wa Gagwe ka Kerekeng ya Gagwe, go tšwetša pele mošomo wa Gagwe?

¹⁴⁹ Ke ba bakae ba lena le lego basetsebje go nna, phagamiša seatla sa gago? Ga ke le tsebe. Go lokile. Ga ke go tsebe. Go lokile. Go lokile. A seo e be e le seatla se sengwe le se sengwe? Diatla tšohle di be di le godimo, gore ba bego ba sa ntsebe? Go lokile. Ke mosetsebje go batho bale. Ga se nke ka ke ka bona.

¹⁵⁰ Ke ba bakae ka moagong e lego basetsebje go nna, ba ke sa le tsebego. Aowa, ga wa swanelo go ba godimo fa, feela e ka ba kae. Gabotse, ke a bona, godimo ga seripa sa phuthego ke basetsebje. Go lokile. Ge gona ke le mosetsebje go lena, ke nyaka go le botšiša ntle fale ka go—ka go batheeletši. Ge Jesu a be a phela lehono... . Gomme go bona ge eba le ke Lengwalo.

¹⁵¹ Nako ye nngwe go bile le mosadi yo a bilego le selo se segolo sa phošo ka yena, taba ya madi. O bile le yona lebaka la e ka ba mengwaga ye lesomepedi, ke a dumela, goba boteletšana. Gomme o be a feditše tšelete yohle ya gagwe go dingaka.

¹⁵² Basetsana ba babedi šeba ba dutše fa ka ditulong tša bagolofadi. Le a dumela, basetsana, gore Jesu o tsogile go tšwa bahung? Le lebeletše go Yena bošegong bjo bakeng sa pholo? A o na le—a o na le ye e itšego... . A o na le karata ya thapelo? Go lokile. Feela ga se ešo ya bitšwa. Seo se lokile. Nno botegang. Go lokile.

¹⁵³ O se belaele. E no dumela bjale. Gomme ge karata ya gago e se ya bitšwa bošegong bjo, e no tla morago go le bjalo gosasa bošego, le a bona. E no tšwelapele... . Ga go kgathale, e no tšwelapele o etla, le a bona, e tla fihla mo. Gomme ebile ga wa swanelo go ba le karata ya gago. E no dumela. Šetša se se diregago.

¹⁵⁴ Gomme go lena ntle kua ka batheeletšing, ba ba se nago karata ya thapelo. Ke batho ba bakae ka mo ba se nago karata ya thapelo? Emišang diatla tša lena. Lebelelang kua. Bjale lena ka ntle le karata ya thapelo, ge batho ba mo . . .

¹⁵⁵ Ke ya go ba thea go Lengwalo. Se sengwe le se sengwe re swanetšego go se dira se swanetše go ba sa Lengwalo, go tloga go Genesi go ya go Dikutollo. E swanetše go ba Modimo. Bjalo ka ge ke boletše bošegong bja go feta, go swanetše go ba bjalo “go tloga mathomong.” Le a bona? Bjale, ge o se ne thapelo . . . Ba mo ba ba nago le karata ya thapelo, ke ya go kgopela wona Mangwalo boka a be a era ka Beibeleng, bobedi banna le basadi.

¹⁵⁶ Gomme go lena ntle kua, ba le se nago ye, ka—ka karata ya thapelo, ba le ka se bego ka mothalong, bošegong bjo. Bjale, le ka ba le dikarata tša thapelo gape gosasa. Eupša bjale . . . Gomme o tla fetša. Go ne ba bantši, gomme re tla ba tliša go kgabola fa, ka tsela ye nngwe, le go ba rapeleta, ge le ka no kgotlelela. Le se ke la hlaganelia; le a bona, ka gona le ya go thothomela ka bolena. Le a bona? E no ema tse, o re, “Modimo, ke fa. O a ntseba.” Gomme—gomme, gona, o bolela se.

¹⁵⁷ Go na le Lengwalo ka Beibeleng, moo mosadi yo a bilego le taba ya madi, gomme o fetile go kgabola sehlopha sa batho ba ba bego ba leka go mo dira gore a homole. Gomme o be a nyaka go fihla go Mong, Morena Jesu. Gomme mafelelong o fihlile mo A bego a le gona, gobane o rile ka pelong ya gagwe, “Ge nka kgona go kgwatha kobo ya Monna yola, ke tla fodišwa.” Ke ba bakae ba kilego ba kwa kanegelo yeo? Bjale, Jesu, a eya mmogo le lešaba, gomme morago ga lebakana mosadi o Mo kgwathile. Ka pelong ya gagwe, o naganne. O dirile eng nako yeo? Tšeо e be e le ditlhologelo tša gagwe. Ge a kgwathile yeo, o ile a feta sešitiši sa lešata. E be e le sona. O be a lokologile. Gobane ka pelong ya gagwe, o rile, “Ke dirile tlwa se ke se nagannego. ‘Ge nka dira, ke tla fola.’”

¹⁵⁸ Gomme a le a dumela, ge Jesu a ka itsebiša Yenamong bošegong bjo, le tla hwetša selo sa go swana? Go lokile. Bjale nmo dumela. Boloka seo ka pelong ya gago.

¹⁵⁹ Gomme ka gona o sepeletše ntle, godimo ka batheeletšing felotsoko, mohlomongwe, le go dula fase. Jesu o eme, gomme o rile, “Ke mang a Nkgwathilego?”

¹⁶⁰ Gomme ba rile, “Ga go yo a Go kgwathilego.” Yo mongwe le yo mongwe o rile, “Ga se nke ra. Ga se nke ra.” Yo mongwe le yo mongwe o e latotše. “Ga a gona a Go kgwathilego.”

¹⁶¹ Gomme Petro o rile, “Morena,” o Mo kgadile, gomme o rile, “O tla bolelelang selo sa go swana le seo?” se sengwe ka mokgwa wo, ““Ke mang a Go kgwathilego?” ge yo mongwe le yo mongwe a Go kgwatha, o kitima kgahlanong le Wena? ‘Halo, Rabi! Ke thakgetše go kopana le Wena, Rabi! Halo, Jesu, Moprefeta wa

Galelia! Re—re thakgetše kudu go kopana le Wena! O dira bjang?" Yo mongwe le yo mongwe o a Go kgwatha."

¹⁶² O rile, "Yeo e ka no ba therešo. Eupša yo mongwe o Nkgwathile go fapano." Yeo ke kgwatho ye o e nyakago. "Yo mongwe o Nkgwathile ka tsela ye ba fetilego sešitiši sa modumo. Ke ikwetše bokwala, bofokodi, bo etla godimo ga Ka, maatla a tšwile go Nna."

¹⁶³ Gomme O lebeletše go dikologa. Gomme ka go Yena go dutše Moya wa Modimo. A le dumela seo? Gomme O lebeletše go dikologa, godimo ga batheeletši, go fihla A hweditše motho yo a Mo kgwathilego. Gomme O mmreditše maemo a gagwe, le go bolela gore tumelo ya gagwe e mo pholosítše. "Ga go pono?" Aowa, O nno tseba gore tumelo ya gagwe e mo pholosítše, ka baka la gore kgogedi ya tumelo yohle ka fale, e be e le ye kgolwane kudu ka go yena.

¹⁶⁴ Bjale, ge Jesu a swana lehono, a A ka se dire go swana? Bjale, o tla tseba bjang ke Yena? Le a bona, bjale, o swanetše go ineela wenamong.

Bjale fa ke moo ke swanetše go lebeleta go Disabonwego.

A ke wena wa mathomo? E kae?

¹⁶⁵ Ke mang a lego ka go... a swerego mothalo? Wena, Ngwanešu Neville? Oo, Billy. Go lokile.

¹⁶⁶ O motho wa mathomo? Go lokile. Bjale o ka no sepela dikgato di se kae kgauswana, ge o rata, mohlomphegi.

¹⁶⁷ Monna šo yo ke nago... ke a dumela o rile ga se ra tsebana seng, kafao ye ke kopano ya rena ya mathomo. Ke tseba bjang monna yola? Ga ke tsebe. Modimo o a tseba, bokgole bjo ke—bokgole bjo ke bo tsebago, ga se ka ke ka mmona ka bophelong bja ka. Fao go mosetsebje wa go phethagala.

¹⁶⁸ Bjale, ke boletše gore Jesu Kriste o a swana maabane, lehono, le go ya go ile. Bjale, seo se theile tumelo ye ntši. Ge seo se se bjalo, gona ke hwetšwa moikaketši, gomme Beibele e a aketša. Bjale, ke swanetše go dira eng bjale? Go lebeleta go selo tsoko sa bohlale? Nka kgona bjang? Ke swanetše go lebeleta go Disabonwego. Eupša gobaneng ke e dira? O e tshepišitše. Ke lena bao. Bjale, *le* dira go swana, gomme *le* dira go swana. Lena bohle le dira go swana. E ka se palelwé. Nka palelwé, le ka palelwé, eupša Modimo a ka se palelwé.

¹⁶⁹ Bjale banna ba babedi šeba, ba kopane lekga la mathomo bophelong bja bona. Bjale, kafao, gore ke tšee nako ya ka.

¹⁷⁰ Bjale, le ke lefelotiragalo la Lengwalo. Go be go le monna yo a ilego gomme a tšea monna, gomme a mo tliša kerekeng, goba mo Jesu a bego a le gona, gomme leina la gagwe e be e le Nathanièle. Jesu o be a se a ke a mmona. Kafao ge a etla godimo go Jesu, Jesu o rile, "Bonang Moisraele yo ka go yena go sego bomenetša."

¹⁷¹ Ge ke be nka bolela seo gore le tle le tsebe se ke bego ke se bolela, ke be ke tla re, “Go na le monna wa go botega, modumedi wa Mokriste.” Ba be ba tla re . . .

¹⁷² “Gobaneng,” o rile, “Rabi, gobaneng, Wena ga se nke wa ke wa mpona bophelong bja Gago. O ntseba bjang? O tsebile bjang?” Bjale, e sego ka tsela ye A bego a apere, gobane bohile ba Bohlabela ba be ba apara go swana. O be a ka kgona go ba Mogerika. O be a ka kgona go ba Moegepeta. O—o be a ka kgona go ba dilo tše ntši.

¹⁷³ Eupša Jesu o rile, “Ke Moisraele. Gomme o a botega, gomme ga go bomenetša ka go yena.”

O rile, “O e tsebile bjang?”

¹⁷⁴ O rile, “Pele Filipi a go bitša, ge o be o le ka tlase ga mohlare, Ke go bone.” Yoo e be e le Jesu maabane.

¹⁷⁵ Ge A swana lehono, gomme a dula ka go ren, ge A tshepišitše O be a tla dira, gomme o tla dira go tsebja go monna yo. A ka no ba fa bakeng sa mathata a ditšhelete. A ka no ba monna a ehwa. A ka no ba motho wa sebe. A ka no ba motho wa toko. Ga ke tsebe. Nka se kgone go le botša, eupša Modimo o a e tseba. Gona, ge A ka itsebiša Yenamong fa, gore Jesu o a phela, gomme o tla botša monna, gona a a be moahlodi ge eba ke nnete goba aowa. Gomme ka gona a seo se tla dira ka moka ga lena go Mo dumela? gore O a bonagala mo. Seo ke Sephedi sa Gagwe. Bjale, A ka se kgone go ipontšha Yenamong ka go mmele wa nama. Ke Moya wa Gagwe.

¹⁷⁶ Bjale, O dumuletše seswantšho sa Gagwe go tšewa kua, le bona seo, seo lefase la saense le nago naso ka Washington, DC. Morongwa wa go swana wa Modimo, Pilara ya Mollo ya go swana, Yo a dutšego ka go Jesu, o dirile selo sa go swana go—go Filipi, goba Nathaniele. Jesu wa go swana o tshepišitše go tla le go dula ka go ren, le go dira mediro ya go swana. Yo mongwe le yo mongwe o kwešiša gabotse bjale? Go lokile.

¹⁷⁷ Bjale, Morena, a nke go tsebje gore Wena o Modimo, le gore re bahlanka ba Gago. Gona, O a re rata. Gomme O nyaka batho ba go Go dumela, le go feta dišitiši tšohle tša sebe lefaseng, gore ba ke ba phološwe le go fodišwa bakeng sa letago la Gago. Amene.

¹⁷⁸ Bjale, go no bolela boka Petro a dirile mo kgorong e bitšwago ye Botse, go monna yo a bego a golofetše go tloga popelong ya mmagwe, o rile, “Re lebelele.” Seo e be e no ba go—go dumela, go mo tliša go . . . šedi ya gagwe, go swara šedi ya gagwe.

¹⁷⁹ Boka Morena wa ren a dirile mosadi mo sedibeng. O mo swere le go swara poledišano ya gagwe. O rile, “Ntlišetše seno sa meetse.” Le a bona, o ile pele, a bolela.

¹⁸⁰ Bjale, ge ke sa go tsebe, o no ba monna yo a bego a le ntle kua ka batheeletšing. Gomme ge ke sa go tsebe, gomme Morena o tla ntlhathollela se sengwe se o se dirilego ka bophelong bja gago,

goba se o se dumago, matlotlo, go phelega, goba e ka ba eng e lego, gomme o tla e dira therešo le go hlaka, gona o tla dumela gore O fa go go fa se o se kgopelago. O tla dira seo? [Ngwanešu o re, "Amene. Ka kgonthe ke tla dira."—Mor.] Go lokile.

¹⁸¹ Tlhomphokgolo bjale. Bjale e no bang ka thapelong, go fihla Moya wo Mokgethwa o thoma go dula godimo ga rena.

¹⁸² Ee. Ke bona monna yo. Gomme o... Ke bona motho yo monnyane yo a emego kgauswi, o ka go potšišo ya, goba, o nyaka go rapelelwa. Ke yo mongwe gape o nyakago a rapelelwa. Yoo ke mo—mo mosetsana, mosetsana yo monnyane. Gomme ga o tšwe nageng ye. O tšwa kgauswi le—le letsha le legolo, felotsoko. Ke, o tšwa toropongkgolo yeo e lego kgauswi le toropokgolo ye kgolo ye e nago le ntlotlhaka ntikodiko ye kgolo. Ke Buffalo, New York. O kgauswi le Buffalo, New York. O na le kgatelelo ya godimo ya madi. Seo ke see e lego phošo ka wena. Eupša o rapediša ngwana yo. A o ntumela go ba mohlanka wa Gagwe? [Ngwanešu o re, "Ka go felela."—Mor.] Ke wena Mna. Holden. Leo ke leina la gago. Boela morago gomme o amogelete se o se kgopetšego. Bea sakatuku sela godimo ga sona, go tla be go fedile ka....?

¹⁸³ A o a dumela Jesu Kriste o a phela? Ke eng? Sa Gosabonwe se ba gobonagala. Ke eng seo? Jesu wa go swana, dikenywa tša go swana, maswao a go swana, selo sa go swana A se dirilego.

¹⁸⁴ Bjale mosadi šo, go latela. Ke bolela le yena boka A dirile mosadi mo sedibeng. A re basetsebane seng sa rena? [Kgaetšedi o re, "Ee."—Mor.] Re bona. Gore batho ba ke ba tsebe, ka ntle, e no—e no phagamišetša seatla sa gago godimo. Kafao ye ke kopano ya rena ya mathomo. Re basetsebane seng sa rena.

¹⁸⁵ Bjale, ga ke tsebe se monna a bilego le sona metsotso e se mekae ya go feta, eupša, e ka ba eng e bilego, ga se ke be le selo go dira le phodišo ya gagwe. Modimo o dirile seo. Tumelo ya gagwe e dirile seo. Ga se ke be le selo go dira le sona. E no ba mpho.

¹⁸⁶ Gobane, ka moagong wo bjale, e no ba mohuta wa go swana wa Barongwa woo Gehasi a o bonego ge Elisa a butše mahlo a gagwe. Ka moagong wo ke Morena Jesu. Kafao, le se ke la lebelela se le se bonago. Lebelelang se le sa se bonego. Gobane, ke tshepišo ya Modimo gore Modimo o rile O tla dira se, gomme O a se dira.

¹⁸⁷ Bjale, O boletše le mosadi motsotso feela, go fihla A hweditše gore bothata bja gagwe e be e le eng. Gomme yeo ke tsela ye ke nyakago go e dira go lena, gobane O dula a swana. Ge ke le mosetsebje, gomme ke sa go tsebe, gona O tla... E swanetše go ba ka tsela ye nngwe, sa kagodimogathago, tsela ye nngwe, go kgoma wena. A o ka dumela gore e be e le Morena wa gago a bego a ntumelela go dira seo?

¹⁸⁸ Bjale, ge le nyaka go tseba, go bile se sengwe se diregile ka moagong feela nako yeo, phodišo. Ke mohumagadi a dutšego fa, thwi ntle fa ka go batheeletši, mohuta wa mohumagadi yo

mokoto. O na le diatla tša gagwe godimo, gomme mahlo a gagwe a tswaletšwe, o a rapela. O na le bothata bja teng le bothata bja mokokotlo, gomme o rapela Modimo go mo fodiša. O dutše thwi mo, o rwele digalase, o apere sutu ye ntsho, thwi mafelelong a mothalo wo.

¹⁸⁹ Wena o nago le diatla tša gago godimo, seo ke se se bego se fošagatše ka wena. Ge seo e le therešo, emiša diatla tša gago ka mokgwa woo. Ga ke go tsebe, a ke a dira? Aowa, mohlomphegi. Re basetsebane. Eya gae bjale. O kgwathile morumo wa kobo ya Gagwe. O Mo kgwathile, gobane ke dikgato tše masomepedi go tloga go wena. Eupša o Mo kgwathile, Moprista yo Mogolo yo a kgonago go kgwathwa ke dikwi tša mefokolo ya rena.

¹⁹⁰ Bjale, ka moka ga lena. Go ne mohumagadi ntle le karata, ntle le e ka ba eng, a nno dula fale a letile. O dira sa go swana. Bangwe . . .

¹⁹¹ Wena o mosadimogatša wa monna yo a bego a no ba mo, gobane ke le bona bobedi ka ntlong ya go swana. Gomme o tlaišega ka seemo sa letšhogo. Gape, ke a bona o bile go ngaka gomme o bile le tlhahlobo, gomme tlhahlobo e be e le ka dikarolong tša tlase. Gomme o re, ka tebelelo, "E re ke dihloga." Gomme seo se ka mogodung le ka go ditho tša bosadi, gomme o nyaka o dirwe karo, eupša o bile le tumelo, gomme o dumela ge o ka tla fa gomme ke tla go rapelela, o tla fola. Ge seo e le therešo, emišetša diatla tša gago godimo, batho ba tla bona.

¹⁹² Bjale, Yena Yo a mo tsebago mo, le go tseba maemo, a A ka kgona go e dira?

Etla fa.

¹⁹³ Morena Jesu, efa, O Modimo, gore tumelo ya gagwe le thabo di tla tlatšwa, bošegong bjo, gore o tla lokollwa ka go felela, le go tliša thabo le pholoso go bao a kopanego nabo. Ke mo rometše . . . le go leleka bobe bjo go tloga go yena, Leineng la Jesu Kriste. Amene.

¹⁹⁴ O ikwela go fapanabjale. E no tšwelapele o ikwela ka mokgwa woo, gomme o thakgetše, e tla go tlogelela go ya go ile, go ya go ile.

¹⁹⁵ O dira bjang? E no ba le tlhomphokgolo ka kgontha, nakwana feela. Bokgole bjo ke tsebago, kopano ya rena ya mathomo. Eupša Modimo o a re tseba bobedi. O tseba ka ga lena gomme O tseba ka ga nna. Gomme ge A ka nkutollela seo o lego fa bakeng sa sona, goba se sengwe seo o se dirilego, seo o bego o se wa swanela go be o se dirile, goba se sengwe o bego o swanetše go be o se dirile, seo o sega wa se dira; eupša o a tseba gore ga ke na le kgopoloo ya gore o mo ka baka la eng. Ge seo e le therešo, emišetša seatla sa gago godimo. Eupša go tla ba, go swanetše go tla ka tlhatho tsoko ya kagodimogatlhago. Ke thabile kudu gore O a swana maabane, lehono, le go ya go ile.

¹⁹⁶ Ga o kgopele thapelo ka bowena, le ge o e hloka. O kgopelela morwa wa gago. Gomme morwa wa gago ga a mo. O ka toropongkgolo ye kgolo, toropokgolo ye kgolo, gomme e ka Bohlabela. Ke bile fao. Lesolo la ka la mafelelo le be le le fao, Philadelphia. Yeo ke nnete. Ke moreri. Gomme ba ya go mo dira karo. Gomme ba mo hlahloba bakeng sa—sa go phatloga. Seo ke O RIALO MORENA. O a bona? A o a dumela gore Modimo o tla dira se o Mo kgopelago go se dira? [Kgaetšedi o re, “Ee. Ee, ke a dira. Ee, ka kgonthé ke a dumela O tla e dira.”—Mor.]

¹⁹⁷ O Modimo wa ka Gosafelego, tiišetša tumelo ya mosadi ka leswao le matete. E fa tlhakodiso ya se seo a se kgopelago. Ka la Jesu Kriste Leina ke a se kgopela. Amene.

A nke Modimo a go fe seo o se kgopetšego.

Gomme ebang tlhomphokgolo.

¹⁹⁸ Mohumagadi yo monnyane ka sakatuku sa gagwe godimo ga nko ya gagwe, o rapelela bothata ka hlogo ya gagwe. A o dumela Morena Jesu o go dira o fole? Mohumagadi yo a dutšego thwi mo kgauswi le monna yo a rwelego digalase. A o a dumela gore Modimo o tla go fodiša, mohumagadi yo monnyane a aperego roko ya go lebega bolou? Phagamiša seatla sa gago ge seo e le se se bego se fošagetše. Sepela gomme o fole. Tumelo ya gago e go dira o fole.

¹⁹⁹ A o dumela Jesu Kriste, Morwa wa Modimo, a ka nkutollela seo o lego fa bakeng sa sona? O ne dilo tše dintši tša phošo ka wena; go tshoga kudu, ditlhakathlakano, bothata bja sesadi, bothata bja sehumagadi, gabotse go phuhlama, seemo sa go šiiša. Ga o tšwe toropongkgolo ye. Efela, o tšwa Indiana, Lafayette. Mdi. Elison, goma. Bolwetši bja gago bo go tlogetše. Eya gae gomme o laetše se Modimo a go diretšego. Amene.

²⁰⁰ A o a dumela gore Modimo a ka mpotša se o lego mo ka sona? Ge A ka rata, a o tla Mo dumela ka pelo ya gago yohle? Ga o mo bakeng sa gagomong. O mo bakeng sa lesea lela. Ge Modimo a ka mpotša se e lego phošo ka lesea lela, a o tla ntumela? Ke sešo sa madi. Yeo ke nnete, a ga se yona? O a dumela, ge nka kgopela Modimo go lelekela seo ka ntle ga lesea, lesea le tla phela?

²⁰¹ Inamišang dihlogo tša lena. Bjale, lesea ke le lennyane kudu go ba le tumelo. Le a bona?

²⁰² O Morena Modimo, ba tlišitše go Wena masea, gomme O ba šegofaditše. Gomme Jesu yola wa go swana o eme a le gona bjale.

²⁰³ Ke ahlola diabolo yo yoo a lekago go tšea bophelo bja ngwana yo wa segotlane. Se tlogele, Sathane. Leineng la Jesu Kriste, tšwela ka ntle ga lesea.

²⁰⁴ Bjale e tšee. O se gane go dumela. Selo se tla tlogela lesea. Eba le tumelo.

²⁰⁵ Papa, o dutšego fao ka hlogo ya gago e inamišitšwe, ka bothata bjola bja sabohloko. Ga ke go tsebe, eupša O a go tseba.

O tlaišega ka dithhaselo tša sabohloko. Gomme o na le kgatelelo ye kgolo ka sefegeng sa gago. Ge seo e le therešo, šišinya seatla sa gago. A o ntumela go ba moprofeta wa Gagwe? Gona eya gae, go tloga kopanong ye, gomme o se tsoge wa tlaišega ka yona gape. Fola, Leineng la Morena Jesu.

²⁰⁶ A o ntumela go ba mohlanka wa Gagwe? Ge Modimo a ka mpotša bothata bja gago, a o tla dumela ka pelo ya gago yohle?

²⁰⁷ Bjale, go na le se sengwe se diregago ka moagong. E no tšwelangpele go dumela. Eupša go ne se sengwe se tlogo ka gare, se tiile, se tiile kudu. Go na le mosadi wa lekhalaate o eme ka lehlakoreng la mohumagadi yo. O no tšwelapele a nyamalala. Ke bona mosadi wa lekhalaate. O dutše thwi morago *mo*. O na le atheraithisi le ditlhakahlakano. O dutše thwi kgauswi le Mdi. Bell kua. O rwele kefa ye ntsho. Ga ke mo tsebe. Eupša, kgaešedi, ge o ka dumela Modimo ka tsela ye o bego o Mo tshepišitšwe nako yela o tla Mo dumelago, go tla be go fedile.

²⁰⁸ Bjale, gore le ke le tsebe gore wo e be Moya wa Modimo. Mothaladi wo o latelago, ka morago ga mosadi, monna yo a dutšego fale ka bothata ka molala wa gagwe. Ge o ka dumela, mohlomphegi, Modimo o tla go dira o loke ge o ka e dumela. A o a e dumela? Phagamišetša seatla sa gago godimo. Ke mosetsebje go wena, eupša ga se Yena.

²⁰⁹ Le a bona, kae kapa kae o lego, e no ba le tumelo ka go Modimo. A o ka kgona go feta sešitiši sela sa gosedumele bjale? A o ka dumelala Moya wo Mokgethwa go tla thwi ka gare bjale le go thopa? Ge o ka kgona, e ka kgona go direga.

²¹⁰ Bolwetši bjoo bja swikiri bo tla go tlogela, ge o ka e dumela. Eya pele tseleng ya gago gomme o hlalale.

²¹¹ O nagana eng ka yona? Ke Yena Lili ya Moeding, Naledi ya Moso.

²¹² Ge o ka dumela bakeng sa seemo sela sa go hloka madi, se tla go tlogela. A o a e dumela? [Kgaetšedi o re, “Ee.”—Mor.] Eya pele tseleng ya gago, hlalala, gona.

²¹³ A le a dumela? A re dumeleng ka pelo ya rena yohle.

²¹⁴ Ge o dumela, eya o je selalelo sa gago. Alesa yela e bego e le ka mogodung wa gago e go tlogetše. Sepela, eja, gomme dumela.

²¹⁵ Ge o dumela, o ka se swanele go hwa. Kankere yela e go tlogetše. O a e dumela? Eya gomme o hlalale.

²¹⁶ Ke ba bakae ba dumelago ka pelo ya lena yohle? Emelelang ka maoto a lena feela bjale. Phagamišetšang maoto a lena, thwi ka pela. Phagamišetšang diatla tša lena godimo, thwi, le go Modimo.

²¹⁷ Bjale, ka mmero o tee, fetang sešitiši se sengwe le se sengwe. Dumela gore Modimo o mo, gomme bolwetši le malwetši a

tlā tloga. Motho yo mongwe le yo mongwe, rapela ka tsela ya gago mong.

²¹⁸ O Morena Modimo, Mohlodi wa magodimo le lefase, bjale ke tliša se go Wena, batheeletši ba ba batho. Ke ahlola diabolo. Ke tteleima gore Jesu Kriste, Morwa wa Modimo, o gona. Leineng la Morena Jesu, a nke moyo wo mongwe le wo mongwe wa ditšhila wa go kamaka, tumelokhwale, gosedumele, le sebe, di tšwele ka ntłe ga moago wo.

Etšwa, Sathane. Ke a go leleka ka Jesu Morwa wa Modimo.

²¹⁹ Yo mongwe le yo mongwe wa lena beang diatla tša lena go lena seng bjale, gomme le rapelelane seng sa lena, mogohle ka moagong, gomme Modimo o tlā le dira le fole. E dumele ka pelo ya gago yohle. Beanang diatla seng sa lena, thomang go rapelelane seng. Yeo ke yona. Yeo ke tsela.

²²⁰ Bohle ba le dumelago gore le fodišitšwe, phagamišetšang diatla tša lena godimo gomme le tumišeng Modimo.

Go lokile, Ngwanešu Neville.



GO LEBELELA GO TŠE DISABONWEGO NST58-1003
(Looking At The Unseen)

Molaetša wo ka Ngwanešu William Marrion Branham, setlogong o abilwe ka Seisimane ka Labohlano mantšiboa, Oktobere 3, 1958, ka Tabarenekeleng ya Branham ka Jeffersonville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org